

李文忠公全書

奏稿



李文忠公奏稿

卷之四十目錄

出洋肄業在事各員奏獎摺

光緒七年正月十九日

光緒七年正月十九日

光緒七年正月十九日

淮軍軍需報銷摺

光緒七年正月十九日

軍需交涉洋務片

光緒七年正月十九日

挑濬大清滹沱兩河下尾摺

光緒七年正月十九日

答覆朝鮮所問事宜摺

光緒七年二月初二日

附清單

唐仁廉不能赴吉摺

光緒七年二月初六日

查覆招商局參案摺

光緒七年二月十一日

東海關京餉分年核議摺

光緒七年二月二十五日

東明仍請改要缺摺

光緒七年二月二十五日

瀝陳感悚下忱摺

光緒七年三月初四日

奏稿四十目錄

曾國荃乞假南歸片

光緒七年三月初四日

籲懇叩謁

梓宮摺

光緒七年三月十三日

請撥鄂漕摺

光緒七年三月十八日

請補造剝船二百隻片

光緒七年四月二十三日

資遣湘毅軍片

光緒七年四月二十三日

截留礮位解奉省片

光緒七年四月二十三日

直境開辦礦務摺

光緒七年四月二十三日

請減出口煤稅片

光緒七年四月二十三日

請開平泉銅礦片

光緒七年四月二十三日

吳仲翔辦理學堂片


光緒七年四月二十三日

滿三德請加副將銜片

光緒七年四月二十三日

請緩蘆課奏銷摺

光緒七年四月二十三日



李文忠公奏稿卷四十

全集一之四十

桐城吳汝綸編錄

出洋肄業在事各員奏獎摺

光緒七年正月十九日

奏爲前派船政生徒出洋肄業在事華洋各員始終勤奮擬懇

天恩給獎以示鼓勵恭摺仰祈

聖鑒事竊臣等接准出使德國大臣兼肄業監督李鳳苞咨開前因福建船政選派駕駛製造生徒出洋肄業經該大臣偕同洋監督日意格隨員馬建忠文案陳季同繙譯羅豐祿等於光緒三年三月內到洋督率肄業三年陸續學成咨送回華其展限補習四月者扣至六年八月亦一律完畢分別留洋遣回在案溯查出洋生徒在船時各限功課不令閒曠既抵英法專延洋師補教以充根柢一面偕同洋監督面商英法部臣將在英之駕駛生先派三

奏稿四十

生登鐵甲船九生入格令尼次官學續將官學八生調入鐵甲船學習歷赴地中海大西洋美利堅阿非利加印度洋等處學習操防排布迎禦之法迨離船後又專延教習補授電氣鎗礮水雷各法俱有船主憑單給執並照章酌量游歷工廠以廣見識是駕駛諸生在船學習不止原定章程分班五六人上鐵甲船已也其在法之製造生先送四生入削浦官學五生入多廊官廠其餘派入汕答佃官礦學及科魯蘇民廠分習開采烹煉鑄鑄等事旋經商明部臣將汕答佃等處五生入巴黎官礦學其製造藝徒初派民廠補習工藝續經分送賽隆及白海士登官藝學該生徒等各照官學定章經專門洋師按年甄別給執官憑並酌量游歷英法比德各國新式機器船械各廠以資考訂凡可傳習各生徒俱已竟功雖天資不一造就有深淺之殊而按章督課實與諸官學卒業

之洋員無所軒輊其製造者能放手造作新式船機及應需之物
駕駛者能管駕鐵甲兵船調度布陣加之歷練應可不藉洋人其
製造如魏瀚陳兆翱鄭清濂林怡游開采鎔煉如羅臻祿林慶昇
駕駛如劉步蟾林泰會蔣超英方伯謙薩鎮冰頗爲優異其餘加
以陶鎔均可成器皆有考取確據委與原定章程辦有成效之語
相符合非在事各員指臂相資未克臻此所有出力各員除正一
品銜前船政監督日意格屢稱渥荷

隆恩不敢再邀獎敘及隨員候選道馬建忠業經

奏獎襄辦文案縣丞錢德培不及三年存記勞績外其文案陳季
同緝譯羅豐祿出使德國二等參贊官徐建寅幫辦監督洋員斯
恭塞格洋文案高氏耶等五員辦理文案緝譯襄助華洋監督移
調生徒料簡妥協及偕同前赴各廠考求機器製造采煉並查察
功課兼習律例公法化學政治等事均能始終勤奮辦理有成應
請照案

奏稿四十

二

奏獎等因前來臣等伏查船政生徒派往英法各國肄業分入官
學官廠於製造駕駛各事均有心得該監督等周歷查察調護維
持實心實力使諸生學業進益已多而隨員等兼習各學疊經考
試取中奔走照料亦著勤勞該生徒等既經學成回華自應照案
給獎以示鼓勵此次出力之監督二品頂戴三品卿銜記名海關
道李鳳苞擬請

賞戴花翎留閩補用都司陳季同擬請免補本班以遊擊仍留原
省補用並

賞加副將銜候選主事羅豐祿擬請以同知不論雙單月歸部選
用並

賞加四品銜候選道徐建寅擬請

賞加三品銜至三品銜一等寶星前福建船政副監督洋員斯恭
塞格擬請

賞給總兵銜洋員高氏耶擬請

賞給三等寶星並加四品軍功俾資觀感而策後效所有帶領船
政生徒出洋肄業在事華洋各員始終勤奮擬請獎勵緣由謹合
詞恭摺具陳伏乞

皇太后

皇上聖鑒訓示謹

奏

淮軍軍需報銷摺 光緒七年正月十九日

奏為淮軍軍需自光緒五年正月起至十二月底止收支款目造冊報銷恭摺仰祈

聖鑒事竊照淮軍軍需前截至光緒四年十二月底止業經列為第七案報銷於光緒六年七月十四日具

奏奉

旨該部知道單片併發欽此伏查光緒五年分淮軍除先後抽裁及遣撤全營外分防直隸保定天津海口並各臺局護運糧餉軍械共計二十七營又提督劉盛休所部銘字馬步十三營駐紮山東張秋鎮一帶又福建陸路提督唐定奎統領銘武步隊十營與調補廣東水師提督吳長慶所統慶字親兵六營分防江蘇沿江南北兩岸礮臺並吳淞海口之武毅右軍五營徐宿馬隊五營共

奏稿四十

四

計二十六營統歸淮軍軍需案內彙冊請銷所有營哨官弁員名勇夫開收總數征防處所先經造冊分咨軍機處戶兵部備查其應需薪費口糧正雜各款並柴薪斤重價值駝騾餵養車輛雇價均循前案楚軍營制與

奏定章程及准銷成案分別截清起止日期接續造報湘平折實庫平仍扣雜款一分平餘又馬隊倒補馬價係照駐紮省分營驛例價核給采辦製造工價水陸轉運糧餉軍火等項雇用車船夫工價腳係核計斤重程途里數悉照軍需則例歷屆准銷各案核給飭據金陵報銷局司道等詳稱自光緒五年正月起至年底止列為第八案舊管項下上屆截至光緒四年十二月底止實存銀七十二萬三千四百三十七兩一錢有奇新收項下綜計浙江四川湖北等省協餉並江蘇藩關釐局額撥軍餉兩淮鹽釐及本案

扣存平餘等項共銀三百一十九萬六千五百六十九兩六錢有奇內登除撥解北洋籌辦防務購辦西洋鎗礮船隻等用應歸海防案內收銷銀五十萬兩又撥放金陵機器局製造工價應歸該局收銷銀二萬兩又附列專冊請銷補放淮軍各營光緒四年十二月月底以前欠餉銀七萬三千八百五十三兩七錢有奇又本案附請

奏銷洋鎗礮隊教習辛工礮費並操練後膛洋礮拉礮車馬餵養夫工倒補馬價及天津行營機器製造局工料用款采辦洋軍火價值等項計三冊共銀一十三萬八千七百一十七兩一錢有奇實計收用銀三百一十八萬七千四百三十五兩八錢有奇開除正雜各款遵照部議酌定軍需報銷章程各歸各部核銷計應歸戶部核銷銀二百一十一萬九千四百一十九兩三錢有奇應歸

奏稿四十

五

兵部核銷銀四萬四千一百一十六兩二錢有奇應歸工部核銷銀六萬九千四十五兩九錢有奇統共請銷銀二百二十三萬二千五百八十一兩五錢有奇實存銀九十五萬四千八百五十四兩二錢有奇已接支光緒六年正月起淮軍馬步水師營哨正雜餉項並購製軍火器械價值工料等用歸於後案舊管項下滾接造報等情具詳請

奏前來臣查淮軍分駐直東江蘇等省籌辦江海防務實關緊要此次造報光緒五年正雜款項均係循照歷辦成案實用實銷並無絲毫浮冒除收支各數分晰造具細冊咨送各部並飭將以後用款接續清理造報外謹會同南洋通商大臣兩江總督臣劉坤一專摺具

奏並繕簡明清單恭呈

御覽伏乞
皇太后
皇上聖鑒謹
奏

奏稿四十

六

軍需交涉洋務片 光緒七年正月十九日

再查淮軍各營洋鎗礮隊教習通事工匠人等辛工金陵天津行營機器製造兩局工料及采辦外洋軍火等項截至光緒四年十二月底止業經附

奏准銷在案此次造報光緒五年正月起截至是年十二月底止第八案內除金陵機器局係與烏龍山製造局歸併合爲一事酌定每年准餉項下撥銀二萬兩自五年正月起月由該局彙總造報詳請專案

奏銷外所有淮軍各營洋鎗礮隊教習通事工匠人等辛工礮費等銀四萬八百九十五兩八錢有奇又淮軍海防各營操練後膛洋礮拉礮車馬餵養夫工倒補馬價等銀三萬五千二百兩五錢有奇又天津行營機器製造局委員薪糧工匠工食購買料物用

奏稿四十一

七

款並采辦外洋軍火價值等銀六萬二千六百二十兩七錢有奇以上總共請銷銀十三萬八千七百七十一兩一錢有奇茲據該司道等按款復加查核均係奉文核實飭發並無絲毫浮冒月造細冊詳請附

奏前來臣查前項各營洋鎗礮隊教習通事工匠人等辛工購買料物洋軍火價值各款皆與洋人交涉無例可循仍應照案據實請銷除將細冊咨送總理衙門戶兵工部查核外伏乞

聖鑒謹附片具

奏

挑濬大清滹沱兩河下尾摺

光緒七年正月十九日

奏爲挑挖大清河下游並月闢滹沱減河以工代賑恭摺仰祈
聖鑒事竊直境之大清河上承西北羣流及西淀巨浸由雄縣會
白溝諸水東經保定霸州文安而趨東淀本爲五大河之一自嘉
道以後久失修治日就淤廢前因巨款難籌先於上游任邱地面
開趙王減河以分洩西淀盛漲新城地面開蘆僧減河以分洩白
溝河盛漲並將清河隄工分別修築惟雄縣霸保境內河身限於
地勢本難多容漲水其自文安左各莊至臺頭二十八里零係入
淀尾閘處處高仰狹窄每屆汛漲停積不下上游亦因之壅潰近
淀近河之安州高陽任邱雄縣保定霸州文安等處頻受其害必
將尾閘挑挖寬深使河水暢洩東淀達津入海又五大河中之滹
沱河自山西發源奔注直境渾流急湍趨向無定自來不設隄防

奏稿四十一

八

同治七年由藁城北徙經晉州深澤深州安平饒陽獻縣河間任
邱雄縣保定霸州下趨文安大窪波及大城其藁城南入子牙河
故道疊次勘查不能挽復而現行河身下游本無出水之路文安
久成澤國獻縣以下沿河州縣亦受害甚深前於河間及文窪中
先開引河秋後啟閘消減但來源極旺減水不多須於獻縣境內
擇地另闢減河使其分歸子牙河達津入海臣於去冬調派助辦
直賑浙江紳士候選道金福會直隸候補道史克寬盛宣懷周金
章分投前往詳細勘度並飭司道會同籌議旋據稟稱大清河下
游擬從左各莊起挖口寬十三丈底以二五收分挖深一丈三四
尺地勢漸去漸低挖深亦漸減至臺頭淀邊挖深九尺上下
可得順行之勢其挖出之土各在十丈以外分別培隄並先築壩
截流挑埽攔水使船隻暫由勝芳河中亭河行走以便開挖惟近

淀之處兩面皆水且老蘆叢密入土根深工程甚屬不易須臨時設法搶辦至淀身人力難施之處卽以機器船接挖約需工費銀十五六萬兩又滹沱減河擬從獻縣朱家口起由半截河頭向東循舊有河形至野廠轉北入子牙河地勢水性皆順本係舊河無礙民居墳墓計工長三十三里零先築攔水埝壩挖口寬十一二三丈底寬五丈高處挖深一丈八尺最窪之區挖深七八尺於河身兩旁五六七丈以外出土堆隄惟上口適當水窪頗難措手中閒須鑿開沙岡工更煩重亦應臨時設法搶辦並於沿河沿隄安設木橋渡船涵洞以便行人而洩隄裏滙水約需工費地價銀十六萬兩等情具稟前來臣查所擬辦法均合機宜大清河下游既暢則洶水可速上游淀河亦不致過於阻遏近淀州縣水患較輕滹沱有此減河雖不能全溜歸槽實添一大消路目前可減獻縣

奏稿四十

九

河間任雄霸保文大一帶水災若將來新河衝刷寬深或冀北流截止文窪有涸復之日直境應辦河工尚多此係擇要經營關係十餘州縣民生休戚必不可緩已派金福會督辦大清河下游工程史克寬督辦滹沱減河工程各將界址預行清理妥籌一切俟春融凍解卽便核實興辦剋期竣工仍集附近災民以工代賑一舉兩得惟兩河工費地價共需銀三十一二萬兩直庫本極支絀民力又甚拮据部款亦難指請惟有商懇東南各省勸捐解濟幸承各該省官紳士商顧念畿疆工賑緊要陸續設法集助約可得銀二十餘萬兩尚不敷銀約九萬兩再由臣督同司道竭力挪湊應急事竣仍歸賑案彙開清單奏報至南省官紳代集巨款拯救災區或更遠來勘辦不辭艱苦實屬無分畛域好義急公有裨大局擬俟事竣與實在辦工出力者查照河工章程擇尤酌懇

恩施以昭激勸其出費官民並照奏定賑捐章程核獎理合恭摺
具陳伏乞

皇太后

皇上聖鑒訓示謹

奏

奏稿四十

十

答覆朝鮮所問事宜摺

光緒七年二月初二日

奏爲朝鮮委員來津請示斟酌答覆相機開導恭摺仰祈
聖鑒事竊上年九月開朝鮮齋奏官卞元圭來津奉

旨令臣妥籌該國學習製造練兵各事業經詳晰覆陳在案嗣接
出使日本大臣何如璋函稱朝鮮外交一事近日廷議漸知變計
又准總理衙門函商隨時設法維持調護並奏請嗣後遇有關係
洋務緊要之件由臣與該國通遞文函相機開導等因奉

旨依議欽此欽遵密行知照前來適有朝鮮國王委員李咨肅隨
今屆貢使來京於正月二十日赴津稟謁據稱專爲奉辦武備學
習事並齋呈該國請示節略一本內載有領議政李最應奏章頗
悔去年六月堅拒美國來使爲非計未則歸重於及今之務莫如
懷遠人而安社稷等語又問他日不得已與各國相交先後早晚

奏稿四十

十一

之策又索中國與各國修好立約通商章程則帶回援照是何
如璋所稱朝鮮國王與執政大臣決意外交而未敢遽發固已確
有明證臣因其節略諮商事件繁瑣先令津海關道鄭藻如等傳
詢一切擬議大概旋准李咨肅進見與之筆談良久該國軍額極
虛餉力極絀誠慮無以自立而所據形勢實爲我東三省屏蔽關
係甚重現其君相雖幡然變計有聯絡外邦之意國人議論紛歧
尙難遽決自應乘機開誠曉諭冀可破其成見固我藩籬惟該國
於外交情事生疏卽如與日本通商五年尙未設關收稅並不知
稅額重輕設再與西國結約勢必被其欺蒙無益有損臣因其來
牘有披露腹心願一一開誨碩畫之語出於至誠遂令前在西洋
學習交涉事宜之道員馬建忠與鄭藻如等參酌目今時勢及東
西洋通例代擬朝鮮與各國通商章程底稿豫爲取益防損之計

交李咨肅齋回俾該國遇事有所據依不至多受蒙蔽又聞該國君相已漸回悟惟原任太師李裕元等不無異議臣於光緒五年七月閒曾遵

密諭轉致李裕元詳切開導嗣接覆書尙未敢遽爾信從此次李裕元來書似仍有不欲遠交之意臣覆函又加敦勸使不至從中作梗此後無論何國再派人往朝鮮議約當無堅拒之理但未便由中國強爲驅迫耳至其節略所詢各條內惟答覆日本國書稱謂一節儻稍涉含混卽於屬邦體例有礙臣查西洋各國稱帝稱王本非一律要皆平等相交該國王久受我

朝冊封其有報答日本及他國之書應令仍用

封號國政雖由其自主應不失中國屬邦之名除將朝鮮寄呈節略及代擬通商約章李裕元來往函稿鈔送總理衙門查核外謹

奏稿四十

十三

將酌覆朝鮮詢問各條照繕清單呈

御覽是否有當理合恭摺由驛密陳伏乞

皇太后

皇上聖鑒訓示謹

奏

謹將酌覆朝鮮詢問各條照繕清單恭呈

御覽

第一條

小邦今與日本開港通商然小邦素昧商規恐被欺壓上下胥願儻邀上國商人來會開港諸處互相交易情志既孚依賴必大云而又有黃參贊策略卽奏請推廣鳳凰廳貿易令華商乘船來開港各口通商以防日人壟斷之句語此論恐未知如何伏候亮教具咨仰請而措詞主何妥當乎並望訓示

朝鮮向無海道貿易之例現旣擬與外國通商則華商前往貿易亦所不禁至於黃參贊策略防日人壟斷之語果能與各國通商日人自無從壟斷將來如願華商前往貿易應由國王將實在情形咨請核

奏辦理

奏稿四十

十三

第二條

敢問小邦他日有不得已與各國相交之際自主自強利權在我不爲他要挾且不失先後早晚之策

此條已於上年九月二十二日曾與齋奏官卞元圭詳晰言之當必於回國時面陳總宜先事豫防自主之權操之在我茲有馬道臺所擬與外洋通商約章節略一冊交付帶回以資采擇

第三條

小邦釜山元山兩港定稅旣蒙大人訓示敢不卽速議定第伊言非全權委任不可舉擬若值全權之來議值百抽幾當恪遵指津隨機圖之各國修好立約通商章程稅則稅額條款稅關設官凡例伏想已有印行文字願蒙賜下各一件謹當帶回援照

釜山元山兩港定稅宜由國王委任委員予以議稅全權字據俾與彼國使臣互換觀看以資取信此乃各國遣使議事之通例也至稅則值百抽幾不必援中國所定通商稅則爲例緣前者中國於外國情形尙未深知僅爲體恤商民而設進出口各貨皆係值百抽五若洋貨運入內地再抽二五子口稅其實未可執一而論上年亦面告齋奏官卞元圭矣若外洋抽稅皆視貨物之暢滯以定稅則之多寡竟有值百抽三十以至值百抽百者若以各物統扯論之大約不在值百抽十五以下今朝鮮國擬與外洋通商儻各貨暢滯未能豫知則值百抽幾亦難豫定不若定一試辦統例進口貨估價值百抽十出口貨估價值百抽五至食用等物數滿十件者亦照則抽稅如此試行三五年貨物之暢滯可知卽則例之多寡可定然後與外洋各國重定稅則洋人決無不從之理蓋

和約與商約有異在我不肯和約決無開豐之端在我欲修商約斷無興戎之舉不然歐洲瑞士比利時蕞爾彈丸介於諸大國之間將商約不修稅則不加而國不足爲國矣至中國各口稅關或設監督專管或飭巡道兼管從前初開通商口岸華人罕諳洋文洋語收稅事件雇用洋人司理仍歸監督巡道節制今朝鮮擬與各國通商日本窺知朝鮮未諳西洋語言文字及稅務事宜難保不以管稅一職自薦充當但日本朝鮮僅隔一水往來商貨必多且聞通商五年尙未收稅喫虧已甚儻僱日人司理稅務尤恐滋弊祇有暫雇西人之明白稅務兼通漢文者令其隨同朝鮮所派管關官員料理收稅較爲妥當並一面速選聰穎子弟從所雇西人學習語言文字稅務事宜學成之後自無容再用西人矣日本初與各國通商於暫雇西人料理稅務兼司教習一節辦理甚妥

是以該國現在稅務辭退西人已能自行管理茲將中國所有通商章程稅則稅額條款飭津海關道檢交該員帶回以資考證

第四條

北洋咨式似依禮部咨式書呈而內書北洋督署大臣外書一體繕寫恐未知如何

北洋咨式應與咨禮部相同內外銜稱應書

欽差北洋通商大臣衙門字樣

第五條

伏見禮部咨示中有委員弁兵學徒通事人等由北洋大臣衙門給發空白憑票交該國按名填給之語空白憑票許令此次帶回以為隨用之地伏望

據關道等面詢稱係先派學藝人來業由該道等詳請給發憑票

奏稿四十

十五

十張交該員具領帶回呈收如學藝人分起前來應按每起填用一張交管領之員執持以憑查驗

第六條

學習人徒來往旣蒙徑從海道自更便捷之教恐是賃乘汽船吉利涉海當自何處賃船可以無礙亦蒙公文不致盤詰

據關道等面詢稱由朝鮮進鳳凰廳邊門計程一千一百餘里再到牛莊營口約三百餘里即從營口或附輪船或附帆船來津較為便捷應於進邊門時將憑票呈東邊道衙門查驗於到營口時將憑票呈奉錦山海關道衙門查驗均候加戳放行若遇有交涉事件仍由地方官約束訊斷

第七條

小邦船舶本無旗標今將議造而黃參贊有奏請襲用中國龍旗

之論敢問中國船上旗身畫樣而小邦則用某色某畫是否有當乎

凡西國商船旗式皆係國主之旗因海上往來俾知爲某國船隻今貴國王自用之旗據稱是畫龍方旗亦與中國龍旗相仿自可
以畫龍旗爲國旗卽作爲船舶旗標應於定用之先將龍旗尺寸
顏色繪具圖式咨明本大臣衙門以憑核

奏咨行

第八條

卑職未渡鴨綠聞日本使花房義實齎其國書而來敝朝以爲條
約中曾有我禮曹與伊外務省書契往來而已無國書往來之規
今何遽變條約乎以此難之彼云現陞辦理公使不可持外務書
契且各國皆有國書然後益加親睦力懇不已國王特念鄰誼親

奏稿四十

七六

臨便殿召接彼使而受之書辭敬白等句頗恭非慢至若皇帝字
朕字極涉礙眼上下俱爲不安且書中所請駐劄最難應從彼言
仁川開港亦不可輕許廷議仁川開港強許以遷就幾年駐劄則
欲因仁川事彌縫然彼之從否姑未可知國書不可不答而稱他
曰帝實所不願至於自稱又無援照往復之際如何撰措庶不失
國體而免笑於各國乎彼之意望又在專价修答非徒事力不敷
隨請隨行豈不損弱乎大人旣垂厚念視均一室故茲敢膽上彼
之國書與口奏伏乞俯鑒指賜良策使我東藩得以固圉全安焉
使臣駐京西洋各國皆同蓋旣通商必有交涉事件公使之駐京
猶之領事之駐口岸非此不能遇事互酌以聯兩國之誼以平兩
國之爭實有益而無損也特東西風氣各殊猝議駐京鮮不意存
顧慮中國從前初與西國通商開口時情形亦然揣度事勢旣經

立約通商斷難始終拒絕與其勉從於後日似不如慨允於目前
況日本使臣駐京一節查光緒二年貴國與日本立約業於第二
款載明現彼據約而求儻不允許卽爲背約其曲在己未免授人
以隙至仁川一港係由海道達王京必由之路如己允開卽踐守
前諾似亦無礙至所云自稱又無援照往復之際如何撰措庶不
失國體而免笑於各國等語茲日本遣使齎奉國書將來貴國答
以國書乃兩國禮尙往來之義答書如何措詞想貴國自有討論
而潤色之者至於國書內所稱名號厯查西洋各國書籍內所載
聘問國書譯其稱謂本非一律如德意志俄羅斯奧斯馬加等國
主皆自稱爲帝意大利口斯巴尼亞瑞典等國主皆自稱爲王閒
有譯漢文爲君主及君王者英吉利國主男則稱王女則稱后迨
前六年始加印度皇后之號如稱王之國致書於外洋稱帝之國

秦稿四十

十七

彼此亦各從其本稱未嘗以稱帝爲尊稱王爲小也貴國久受
中朝冊封如有報答日本之書理應仍用

封號將來傳聞各國衡以西洋通例當無笑貴國爲失體者

唐仁廉不能赴吉摺

光緒七年二月初六日

奏爲吉林請調總兵仍須在本任辦理海防急切難易生手恭摺
仰祈

聖鑒事竊臣欽奉光緒六年十二月二十五日

寄諭前據銘安奏請調總兵唐仁廉差遣旋據李鴻章奏該總兵
統帶所部駐防海口且有承辦要務未能派赴吉林茲據銘安喜
昌奏稱現聞該總兵修築礮臺業已告竣仍請飭調赴吉總統三
姓防營沿江礮臺亦令相度辦理等語著李鴻章卽飭該總兵迅
赴吉林俾資防守等因欽此當經轉行遵照惟查唐仁廉係實任
通永鎮總兵飭統馬步五營駐紮北塘海口該處爲畿境緊要門
戶實與大沽防務並重雖礮臺營牆逐漸修築苦於經費支絀尙
未完工應設礮位亦未齊備並應添造水雷地雷電鏡等房及儲

奏稿四十

六

備軍糧子藥庫其煙頭沽調駐練軍一營亦歸該鎮節制尤宜及
時趕修礮臺俾資犄角唐仁廉素稱驍勇熟悉北塘沿海情形該
處防務工程購料甫齊春融興作須責令一手經理况靈軍馬步
各營分紮樂亭灤州一帶均係通永鎮汛地唐仁廉又爲鮑超舊
部主客之交賴其照料聯絡唐仁廉辦理北塘防務數年兵將相
習若遽易生手誠恐呼應不靈致滋貽誤至吉林三姓江防亦關
緊要吳大澂前委直隸州知州戴宗騫募練馬步五營銘安等所
調副將劉超佩三營郭長雲一營現在併紮三姓該將領皆久在
直隸軍中於訓練紀律修築礮臺情形均尙熟悉又有吳大澂往
來督率但使餉械不至短缺號令無所紛歧籌防可臻穩固唐仁
廉與戴宗騫郭長雲等素未共事卽強令前往統帶轉慮不能得
力於吉林江防無甚裨助而

畿輔海防亦乏替人除咨覆銘安等知照外理合恭摺覆陳伏乞
皇太后
皇上聖鑒訓示謹
奏

奏稿四十

九

查覆招商局參案摺

光緒七年二月十一日

奏為查明招商局員被參各款分別整頓辦理恭摺仰祈

聖鑒事竊臣欽奉光緒六年十一月二十六日

寄諭祭酒王先謙奏招商局務宜加整頓各摺片設立招商局原
期收回中國利權如果局員等營私害公敗壞局務亟應痛加整
頓李鴻章創辦此局責無旁貸著逐一嚴查認真整飭如唐廷樞
等實有侵帑把持並設計排擠各情即行從嚴參辦葉廷眷經理
是否確有成效其辦理章程有應變通之處及早設法該祭酒請
令商船出洋目下情形能否及此將來如何漸次開拓妥籌具奏
等因欽此遵經札派江海關道劉瑞芬津海關道鄭藻如將所參
各款逐節嚴查旋據該關道會同南洋所派之江南製造局道員
李興銳稟稱招商局銀錢帳目向由駐滬道員徐潤一手經理當

奏稿四十

三

向調冊詢核並就原奏分條查覆如朱其昂等購船價貴均即沈
沒虧折殆盡一節該關道等查同治十一年已故道員朱其昂購
買伊敦福星永清三船於上海天津各立碼頭運漕攬貨因創辦
之始外洋及貿易情形未熟船價稍貴其用人濫而糜費多亦所
不免次年添派道員唐廷樞徐潤會辦增置輪船碼頭頗有餘利
將朱其昂虧折四萬餘兩分年提補其伊敦一船旋在大沽遭風
沈沒福星一船在黑水洋被英船撞沈令洋商賠結此皆事出意
外並非船不堅固該局厚生江長兩船亦在江海失事均歸保險
局償還於局本尚無虧損又原奏唐廷樞盛宣懷以公項私買旗
昌股票抵數扣帑入己旗昌原本已虧收買時仍照原本開報一
節該關道等查光緒二年_臣處撥給官款係添購豐順保大江寬
江永四船之用唐廷樞等並無挪移私買股票是年冬收買旗昌

輪船等項由南洋撥給官款銀一百萬兩分期交付旗昌洋商取
有收據且係徐潤經手唐廷樞盛宣懷更無扣帑入己之事惟應
付旗昌銀二百二十二萬兩除撥官款外應照盛宣懷等原稟由
各商湊集銀一百二十二萬兩乃僅招商股四萬餘兩以之抵還
旗昌一百二十二萬兩所短甚巨遂由局借墊銀四十餘萬兩付
給旗昌尚短銀六十九萬兩係將官本緩息商股存息以及保險
餘費按年積存陸續歸楚未踐原稟之言致有疑爲詭詐者洋商
房產交易向有五釐中金分給經手之人卽盛宣懷等原稟花紅
是也買價至二百餘萬之多應提花紅銀數不少盛宣懷等主持
其事卽使毫不沾染難免羣疑眾謗至旗昌股票唐廷樞徐潤或
有一二盛宣懷久在仕途未必有此卽有股票不難逕向旗昌取
銀何必劃扣付款且旗昌亦斷不肯將應收價銀任唐廷樞等劃

奏稿四十

三

扣入己其輪船等項買價二百二十二萬兩係照市值估價並未
將旗昌虧折之數併入買價開報亦屬眾所共知又原奏侵虧之
銀加攤輪船各值之上葉廷眷接辦起色被唐廷樞盛宣懷排擠
畏咎引退唐廷樞等恣意侵挪一節該關道等查招商局本上屆
結帳計存官款銀一百九十萬兩有奇商股八十餘萬兩所置輪
船碼頭等項其實用銀三百六十五萬九千二百兩以存抵用短
銀九十二萬五千餘兩除以保險公積等款濟用外尚短銀七十
四萬五千餘兩係由唐廷樞徐潤等向錢莊借墊並無現銀存局
無從侵挪現將碼頭船棧等項核估市價尙屬相符可信其無加
攤各值之事至從前獲利無多未能卽除船舊光緒四年七月至
六年六月兩屆結帳均有盈餘其餘船棧成本銀八十餘萬兩此
後若逐年得利陸續減折將可折成船料道員葉廷眷係光緒四

年秋閒由唐廷樞等稟請奏委入局會辦因於生意未悉始則力辭繼則稟明試辦一年到局後卽赴蘇浙江鄂等省商辦漕務迨回滬與唐廷樞等商議將總分各局用費責成經手之人包辦稍得節省五年春赴津通交米至秋南旋中途感冒兼以老母多病具稟乞退未准隨卽請假侍奉醫調葉廷眷之入局係唐廷樞等稟請決無排擠之事且局中結帳皆有餘利局務尙有起色亦何至畏咎引退又原奏官款分年提還局務歸商而不歸官是以庫帑供唐廷樞等營私之用一節該關道等查光緒六年臣與署南洋大臣吳元炳奏定商局官款除還東海關等銀十二萬餘兩外尙存銀一百七十餘萬兩自是年起分作五年將漕漕應領水腳全數抵還其輪船運漕用費取給攬載客貨之中以後生意盈虧在商不在官使官帑先有著落等因蓋專指生意盈虧而言非謂

奏稿四十

三

局務卽不歸官也又查光緒三年奏案官款自是年起緩息三年俟光緒六年起勻分五年緩息按本統計八年官款全清其緩收息款以後或作官股或陸續帶繳屆期察看情形再議等因是至光緒十一年官本還清之後尙有八年息銀約九十餘萬兩若存局作爲官股應由局按年繳利否則由局將原息陸續繳官斷不能任唐廷樞等自肥私橐該關道等又查臣於光緒六年六月奏准將各省借撥該局官款每年應還銀三十五萬餘兩酌提三屬合銀一百餘萬兩以抵訂造鐵甲船之需與商局並無出入自應逕解北洋無須如原奏由南洋收解其餘兩屆應否由南北洋分收撥解請屆時酌定又查總分各局銀錢出入定章本應按船開報若如原奏用關道三聯印票殊於商情體制有礙應無庸更張並據該關道等籌議華商運茶華船出洋二事暨整頓商局事宜

具稟前來臣詳核該關道等查覆各節大致明晰但尚有錯誤之處查光緒二年冬盛宣懷等公稟南北洋原案據收買旗昌輪船等項合銀二百萬兩議由是年十一月十九日付頭批銀二十萬兩十二月十八日付二批銀二十萬兩次年正月十七日付三批銀六十萬兩即行交盤此外一百萬兩作為旗昌暫存商局八釐起息分期歸還又漢口等處碼頭等項連花紅合銀二十二萬兩於六箇月內交銀過戶惟商局並無餘力此項資本二百二十二萬兩除旗昌向有華股二十萬兩可勸令仍充股分外請撥官本銀一百萬兩並飭兩淮運司會勸淮商每一引搭股銀一兩可得銀七十九萬二千餘兩再通飭各藩司各海關道隨時勸諭商富搭股等情當經臣鈔咨總理衙門查核有案是原稟並無已集商股一百二十二萬兩之說不得謂其詭詐欺朦嗣因怡和太古兩

奏稿四十一

三

行更相傾擠各司道既未幫同勸諭各商亦未即附本故僅集股銀四萬餘兩此則時勢使然未可苛責局員者至該局既驟難集股自不能不暫向錢莊借墊及以緩息等項應急係屬變通辦法亦不得怪其未踐原稟之言又花紅即是中金一節臣傳見當日經手之唐廷樞面加嚴詰據稱係上海金源輪船公司所得蓋旗昌兼辦金源公司每年得行用銀十餘萬兩今將全幫輪船賣給商局其公司生意即歸局經理該公司行主每年少十餘萬進項而各口所用辦事人等給予薪水盤費令其回國或另謀事是以於漢口等處碼頭等項價銀之內議及花紅以為該公司津貼彼先索要漢口等處碼頭等項價銀二十五萬兩花紅銀十萬兩商局僅共給銀二十二萬兩立有約據聲明此項價銀二十二萬兩其售於本局上海輪船公司之花紅亦在其內早經鈔呈轉

咨總理衙門有案所謂上海輪船公司者卽金利源也所謂上海輪船公司之花紅者卽金利源所得也開載本已分明不難調據查考此事雖盛宣懷徐潤朱其詔先至金陵請示而各項價值均由唐廷樞與旗昌行主面議既係兩家自行成交並無居閒之人焉有中金之理盛宣懷於畫押之日已赴湖北礦局並未在場所有商局應付旗昌價銀二百二十二萬兩均已陸續交付明白不但有合同收字爲據且各次付銀係西洋匯豐銀行代收一付一收鍼孔相對又有商局旗昌匯豐三處帳簿可憑若有分文花紅交付商局經手之人儘可查詢旗昌行主調核各處帳簿卽在滬股商及本局所用華洋各夥千百人亦屬共見共聞斷難掩飾等語情詞甚爲真切臣疊次訪察亦未聞有盛宣懷等沾染絲毫中金之事乃該關道劉瑞芬等於集股一節並未細查原稟於金利

奏稿四十

五

源所得花紅一節又未調查收銀字據疑爲商局經手人所得中金殊屬錯誤應卽照案更正以昭平允至招商局爲收回中國利權關繫大局甚巨臣於同治十一年定議創辦誠如

聖諭責無旁貸是以疊經維持整頓嚴飭局員實心經理以期久遠不做隨時奏明有案事雖商辦官仍督察並非漫無鈐制斷不容其恣意侵漁該局本爲洋商嫉妬從前旗昌怡和太古三行合力傾擠疊將水腳跌價有減至一半者有減至三分之二者商局不能不隨之俱減以致無利有虧商股亦多裹足迨收買旗昌後資本短缺又有修理船隻之用仍須出息借貸並飭運直晉賑米多而且急局船不敷調用由局代雇洋商輪船賠貼水腳損剝等費嗣經唐廷樞等與怡和太古設法議和生意順手意外虧賠之費亦少故自光緒四年七月至六年六月兩屆結帳皆有盈餘僅

借錢莊銀七十餘萬兩較之光緒三年缺本一百四十餘萬兩已減輕七十萬兩又除船舊等項銀八十餘萬兩其尾欠旗昌價銀六十九萬兩亦經歸結清楚實係漸有起色盛宣懷早經到直候補局務已不與聞其會議收買旗昌乃去一大勁敵洵屬借資定主之謀劉瑞芬等稟覆亦謂其具有遠見於商局不為無功該員與唐廷樞等既無侵帑害公把持排擠情事均應請

旨免其置議唐廷樞熟悉中外語言文字船務商務與徐潤辦有成效應仍責令唐廷樞徐潤實心經理由臣等隨時稽查督飭其一切出入帳目按期分晰開報俾供眾覽每年結帳時照章由滬津兩關道就近赴局清查一次所有該局內外各項挂欠帳目十餘萬兩卽令唐廷樞徐潤分別催收追繳提還具報嗣後不得挂欠轉致輻輳劉瑞芬等以攬載客貨難免代攬之人挪前壓後或

奏稿四十

三五

串通輪船司事以多報少銀兩延不解局其局中股票聞有巧滑之徒減價收買另招新股更名抵給從中漁利擬請整頓兩條應嚴飭唐廷樞徐潤認真釐剔防範力杜流弊凡用人一切不得稍涉瞻徇浮濫糜費違則從嚴參辦至局存各省官款銀一百七十餘萬兩臣前已奏定自光緒六年起由運漕水腳內分作五年扣還內應酌提三屆銀一百餘萬兩抵作訂造鐵甲船之需其第四屆第五屆銀約七十萬餘兩仍應歸還各省內如湖北省因上年裝運軍軍來直輪船水腳無款可籌已擬將第四屆官本作抵浙江省因海塘工程需款屢請提撥濟用此外各省情形略同自應將第四五兩屆應還官本屆時於運漕水腳內照數扣出撥還各省歸款以符原議而免紛更其八年緩息之款合銀九十餘萬兩並照奏案或作官股生息或陸續帶繳屆期察商核辦至王先謙

片奏華商運茶赴俄照俄商稅則辦理並設宏遠公司華船運貨赴外國兩節查俄國需用之茶向由華商專運獲利頗厚今被俄商佔去據劉瑞芬等稟稱能將華商運俄之茶亦照俄商稅則只完正半兩稅自可漸復華商舊業有裨大局不僅招商局轉運獲益容臣咨商總理衙門核辦至黎兆棠前擬設立宏遠公司以巨貨難集尙未定議招商局船前曾駛往新嘉坡小呂宋日本等處因該處各有公司輪船攬載未能與抗光緒五年派和眾船試走夏威仁國之檀香山美國之舊金山該兩處華人雲集裝載客貨尙旺六年添派美富輪船常川往來臣因訂購英廠碰快船將成遴派員弁水手出洋驗收飭局派海琛輪船裝載駛往倫敦是華船赴外國招商局已經試行劉瑞芬等謂應就局船相機逐漸推廣藉資獲益自應照辦所有查明分別整頓辦理緣由謹據實恭

奏稿四十

三

摺由驛覆陳伏乞

皇太后

皇上聖鑒訓示謹

奏

東海關京餉分年核議摺 光緒七年二月二十五日

奏爲東海關洋稅奉撥京餉五年分業經解足六年分收數不敷報解擬請展緩免議恭摺仰祈

聖鑒事竊據東海關監督登萊青道方汝翼稟稱東海關六成洋稅光緒五年奉撥京餉銀五萬兩係於是年七月十二月兩次委解足額並無帶欠奉有印收批迴惟戶部仍奏請議處應懇查案更正至六年分京餉五萬兩本應依限解足但稅款之旺衰視乎商船之多寡上年各省籌辦海防大軍雲集人心驚疑船貨頓少以致洋稅收數甚絀且天津爲京城門戶練兵月餉甚關重要向指津東兩關洋稅不得不先其所急以維大局然亦不能按額解齊計自光緒五年十一月二十日第七十八結起至六年十二月初一日八十一結止實收六成洋稅招商局船稅及半稅銀十七

奏稿四十

七

萬三百餘兩連七十七結存銀二萬三千九百餘兩共合銀十九萬四千二百餘兩已批解部庫五年分京餉二萬五千兩抵作閩餉一萬兩六年分京餉二萬五千兩抵作閩餉一萬兩共解部庫銀七萬兩又解津防練兵月餉五萬兩又出使經費一萬九千八百餘兩又稅務司薪水及本關經費六萬四千四百餘兩總共解支銀二十萬四千二百餘兩以收抵支實不敷銀一萬餘兩係暫時設法墊解是以除欠津餉外尙欠六年分京餉銀二萬五千兩委係無款可籌非敢藉詞延宕查洋稅向係儘徵儘解如本款徵數有限報解未能足額歷有展緩免議成案可循此次因各省辦防商貨減少稅收短絀實由時勢使然稟請

奏咨前來臣查五年分京餉該關既經解清其戶部奏請交議之案自應更正至六年分京餉收不敷解係屬實情尙非無故延欠

且已墊解萬餘金現在尚未歸補相應仰懇
天恩俯准將下短六年分京餉銀二萬五千兩照案暫行展緩免
其議處俟稅收稍旺卽行補解以資周轉除咨明吏戶部外理合
會同山東撫臣周恆祺恭摺具陳伏乞
皇太后

皇上聖鑒訓示謹

奏

奏稿四十

三

東明仍請改要缺摺 光緒七年二月二十五日

奏爲直隸東明縣中缺現有黃河重大工程仍請改爲沿河要缺
恭摺仰祈

聖鑒事竊大名府屬之東明縣知縣本係二字中缺向無河道隄
工自咸豐五年河南銅瓦鑲黃河決口改道北行該縣適當其衝
遂阻於河之南岸歷年頻遭水患地方凋敝閭閻困苦獄訟滋多
凡撫恤災荒緝捕盜賊審理案件頓增數倍光緒二年境內創築
南隄一道縣互六十餘里又有修防之責非通曉吏治諳悉河務
之員殊難勝任臣於光緒三年

奏請改爲繁疲難三字沿河要缺遇有缺出由外揀員分別調補
以期治理得人旋經吏部議覆應照例於本省繁缺內酌定一缺
改爲簡缺方可將東明縣缺互換改繁等因臣查中簡缺分改繁

奏稿四十

五

須擇一繁缺改簡之例係指地方尋常員缺而言蓋或彼縣田畝
村鎮改隸此縣或彼縣人民商貨遷移此縣此增則彼減故可繁
簡互換今東明因河道隄工請改繁缺與尋常事體不同查黃河
係由他省遷來直省之河並無遷去焉有互換缺分歷年各省添
改員缺甚多卽如山海關本係監督而改爲道員天津縣本係沿
河而改爲海疆津海關本無道員營口本無同知而均添設並未
議及互換可知因時因地以制宜不能拘泥常例也且黃河北徙
從前南路各省沿河州縣皆已無工正可彼此相抵不必於直省
互換直境爲黃河經由者開州長垣東明三州縣開州長垣距河
較遠工段不多尙皆平穩無須改爲沿河字樣卽亦置之不議惟
東明逼近河脣工長責重近來大溜直刷隄根奇險疊出去歲霜
清後竟致高村漫口雖已堵築合龍而此後修防事宜萬分緊要

必須責令地方官會同委員相機安籌經理若仍按班選補此項人員情形既多生疏河工更非素習況距省千餘里斷難於選補到任誤事後始行撤換據藩司任道鎔臬司方大湜查明現在本省丞倅牧令繁要沿河各缺中實無可改中簡之缺相應仰懇特恩俯念黃河工程重大准將東明縣知縣改爲繁疲難三字沿河要缺免其互換嗣後遇有缺出揀員分別調補毋庸按班輪用以裨地方理合恭摺具陳伏乞

皇太后

皇上聖鑒訓示謹

奏

歷陳感悚下忱摺光緒七年三月初四日

奏為歷陳感悚下忱恭摺仰祈

聖鑒事竊臣恭閱邸鈔二月二十二日奉

上諭通政使司參議劉錫鴻奏疆臣不堪倚任臚款參劾各摺片披覽所奏殊堪詫異李鴻章久任封圻深資倚畀其平日辦事原不能一無過失朝廷隨時訓誡亦未嘗稍有寬假據劉錫鴻所陳各款如奏留藩司任道鎔入覲為蔑視綱紀覆奏籌備餉需一疏為貌抗朝廷腹非諭旨優保委員黃惠和等為妄言欺謾等情深文周內已屬支離至謂其跋扈不臣儼然帝制並以荒誕不經之詞登諸奏牘肆意傾陷尤屬謬妄糊塗朝廷於馭下聽言一秉至公似此信口誣衊不可不予以懲處劉錫鴻著交部嚴加議處欽此跪誦

奏稿四一

三

綸音戰慄悚惶罔知所措伏念臣本無學術又乏才能惟此報

國之孤忠所自盟於幽獨者始終未敢稍懈徒以久在軍中積受勞傷今已年屆六旬精力日憊衰病交侵責任過鉅政務過繁往往有精神疏漏之處偶不及檢輒叢咎謗祇緣受

恩深重時事艱難未忍之一日之假偷一息之安致廢要公貽憂君父不圖劉錫鴻挾臣上年遵

旨奏撤出使德國之嫌橫生蜚語被以惡名若依所言生既無顏濫廁於

朝班死亦未能塞責於地下自非我

皇太后

皇上天地再造之恩察臣無他明臣無罪雖復肝腦塗地天下後

世誰喻臣心此臣所由感激

仁施不禁嗚咽自傷寢食俱廢者也惟是臣之過失本在

聖明涵覆之中曲宥

微臣

已爲至幸罰及言者亦所難安以臣誤

叨重寄積有愆尤清夜自維凡所設施愧未克仰副

訓詞稍贖眾望就使指摘未及臣亦時切兢兢惟有益勵恪恭常

存敬畏集眾思以攻闕矢小心以奉公不敢愛身不欲文過冀無

負

朝廷倚畀保全之至意臣不勝犬馬怖懼謹繕摺瀝陳伏乞

皇太后

皇上聖鑒謹

奏

會國荃乞假南歸片

光緒七年三月初四日

再新授陝甘督臣會國荃此次回津會商交卸山海關防務足疾困憊情形較前更甚臣屢往看視據稱與北方水土不合積受疑寒兼因從前軍營傷毒串入筋絡是以動輒牽痛步履維艱須趁此時赴南中溫和地方設法調治猶可漸冀痊愈業蒙
恩賞假就醫仰見

聖明體恤下情無微不至該督臣以病軀狼狽未敢附搭輪船再受顛簸眩暈之苦一面將經手事宜交替清楚卽於三月初三日力疾登陸緩程南下理合附片陳明伏乞

聖鑒謹

奏

額懇叩謁

梓宮摺

光緒七年三月十三日

奏為

恩准赴京叩謁

梓宮仰祈

聖鑒事竊臣恭讀三月十一日邸鈔

哀詔

遺詔驚悉

大行慈安端裕康慶昭和莊敬皇太后仙馭升遐搶地呼天神魂

飛越痛念

大行皇太后前後垂簾臨御寰宇近二十年無日不在憂勤惕厲

之中值時局之多艱每潛移而默運

昕宵勤政佑啟

中興

聖德

神功隆古無比何圖一旦委棄臣民溥海含悲攀號莫及矧臣待

罪畿疆久荷

知遇之隆

倚畀之重

高厚生成涓埃莫報粹聞凶耗瞻望

闕廷五中摧裂罔知所措亟思就近叩謁一展哀戀之忱恭慰

皇上大孝伏冀

節哀順變隨時珍衛並籲請

慈禧端佑康頤昭豫莊誠皇太后勉抑哀思藉資靜攝速臻康復

以慰中外億兆民人之望合無籲懇

天恩准臣匍匐赴京叩謁
梓宮虔申哀悃並卽瞻觀

天顏跪聆

聖訓不勝戰慄迫切待

命之至謹繕摺具陳伏乞

皇太后

皇上聖鑒訓示謹

奏

奏稿四十

三

請撥鄂漕捐 光緒七年三月十八日

奏為順直災區民情困苦籲懇

特恩賞撥鄂漕以應春撫急需恭摺仰祈

聖鑒事竊上年順直各屬東北窪地被水西南高地被旱共計災

歉六十二州縣經臣奏奉

上諭分別蠲緩糧租即就去春賑餘漕米及捐湊各款分撥散放窮黎藉過嚴冬並於預籌今春接濟事宜摺內聲明屆時察看情形懇

恩酌賞南漕等因在案茲查東北較高地面水漸消退其低窪之處積水仍深麥收失望冬春雪雨稀少西南一帶益形乾旱春麥未能布種其已種者待澤孔殷疊據災重之順天所屬文安大城霸州寶坻保定武清直隸所屬河間雄縣任邱高陽肅甯天津等

奏稿四十

三

州縣紛紛稟請撫恤雖經籌款集捐於文安縣開濬大清河下游於獻縣戶闢滹沱滅河各數十里以消積患而興水利俾附近貧民傭趁餬口但災區窮黎較多值此戶少蓋藏青黃不接謀生乏術飢困堪憐必應設法撫綏庶免委填溝壑直隸當大祲之後庫儲羅掘一空不得不作發糶之請查湖北省本年仍辦漕米三萬石業據招商局領價采購即可由輪船運津本屆江浙海運交倉漕米已較往年加增此項鄂漕三萬石為數無多若截撥直賑於京倉尚無所損而近畿飢民實資全活合無籲懇

天恩賞給湖北本年采運新漕三萬石即在天津就近截撥責成天津道吳毓蘭會同賑局認真驗收由臣督同司道詳察順直災區輕重及時分撥遴委委員會同地方官確查戶口核實散放並酌量以工代撫務使實惠及民不准絲毫弊混其隨漕剝船耗食

米石及由津運通船價等項請照案飭令該局核扣解交賑局津貼運費如蒙

俯允所請

特旨宣示則

恩出自上益足固民志而廣

皇仁是否有當理合會同兼管順天府府尹臣童華府尹臣李朝

儀恭摺由驛具陳伏乞

皇太后

皇上聖鑒訓示謹

奏

再剝船之多寡必以米數爲權衡從前江蘇起運漕糧僅五六十萬石浙江僅二三十萬石是以剝船一千八百隻按兩省米數分成勻撥尙可敷用近年米數遞增上屆江蘇起運七十餘萬石浙江起運四十餘萬石本屆又增八萬餘石較從前計多四五十萬石剝船仍止此數實屬周轉不開雖疊飭天津道分派員弁節節催提務令回空迅速但米多船少每有停斛待運之虞現當規復漕額必應添備剝船乃免貽誤查向例本有剝船二千五百隻核計現短原額七百隻勢難全數補足擬請先行補造原額剝船二百隻照例由江西承造一半湖南北承造一半均令於來年春閒解到天津在該省補造無多尙易爲力在直隸轉運稍速藉濟要需庶於漕務有裨擬請

奏稿四十

天

敕下該三省督撫臣迅速籌辦至直東運司撥解天津道庫工食油艙等項僅敷現有剝船用費其補造之剝船二百隻應請由部添撥工食油艙等項銀兩以資應用所有現短原額剝船請另補造緣由理合附片具陳伏乞

聖鑒訓示謹

奏

資遣湘毅軍片

光緒七年四月二十三日

再臣前與新任陝甘督臣曾國荃會奏分別撤留山海關防軍事
宜奉

旨著照所議辦理務當悉心經理次第布置俾遣散撤回各營沿途安靜等因欽此查此次遣撤各軍以記名藩司劉連捷所統湘毅軍七營福祿壽三營爲大枝本擬五月初開飭該藩司帶至長沙六月下旬遣散卽以五六月之餉作爲川資惟該十營人數旣眾山海關距湖南三四千里若由陸路行走深恐長途難於約束復經會同商酌卽調招商局輪船由附近關門之秦王島海口分批裝送上海酌換長江輪船送至漢口再雇民船駛赴長沙遣散歸農俾臻妥速但須提早起程騰出月餉以作輪船水腳議定後卽分飭該藩司劉連捷暨招商局遵照旋據該藩司稟稱招商局

奏稿四十

三五

派永清日新漢廣鎮東輪船四號於三月十八二十一日先後抵秦王島卽令記名提督葛清泰總兵朱連勝袁大陸王其章等分船管帶連行李軍裝等項作爲兩批裝送其由晉所募伙勇工役前已遣歸至中營馬隊衛隊交記名提督劉崢參將張其益帶領先由陸路開拔其餘各營弁勇概登輪舟南駛該藩司與郎中劉鴻年分批督率前進並據招商局員稟稱頭批兩船於三月二十二日到滬仍由原船轉運漢口後批兩船於二十五六等日到滬卽換江輪赴漢沿途均稱靜謐等情具報前來所有湘毅軍等十營全數遣撤緣由除分咨查照外理合附片具陳伏乞

聖鑒謹

奏

截留礮位解奉省片

光緒七年四月二十三日

再欽奉三月二十三日

上諭岐元等奏請將郭寶昌撤回各營內兩磅後膛礮六尊格林礮兩尊馬梯呢後門洋鎗五百桿並火藥鉛丸全數截留等語江南本有應解奉省軍械現在尙未解到著李鴻章飭令郭寶昌將該營礮位等項照數截留其應如何運解及酌留員弁兵丁俾資訓練之處並著李鴻章查明辦理所有此次截留礮位等項著劉坤一於機器局如數撥給由裕祿知照郭寶昌領用以利操防等因欽此其時已據郭寶昌呈報開拔頭隊回皖業將鎗礮等項裝船運津僅有兩磅後膛礮六尊尙存山海關防所經臣飛飭該鎮截留解奉卽據郭寶昌將兩磅後膛礮六尊委員廉誠由關逕解奉省一面揀派諳練鎗礮弁勇陳富超等六人隨往教練由郭寶

奏稿四十

四十一

昌籌給運腳川資至馬梯呢後門洋鎗本係營勇逐日操練之件查明到津後業經各營自行攜帶南下難再追回其格林礮二尊及礮子七萬九千粒兩磅後膛開花礮子二千六百六十五箇拉火三千枝洋藥五千斤鉛丸五千斤銅帽二十萬粒銅五件八十副均由津截留飭據郭寶昌委員吳明鑲杜濬魁管解雇裝海船運赴營口交山海關道續昌驗收再由岐元派員提解應用所需由津至營口船價川資銀三百二十兩飭天津支應局墊發仍由奉省解還歸款至截留礮位各件卽由江南照數撥給郭寶昌領用除分咨查照外理合附片覆陳伏乞

聖鑒謹

奏

直境開辦礦務摺

光緒七年四月二十三日

奏為直境招商購器仿用洋法開辦礦務疏通運道漸有成效恭摺仰祈

聖鑒事竊惟天地自然之利乃民生日用之資泰西各國以礦學為本圖遂能爭雄競勝英之立國在海中三島物產非甚豐盈而歲出煤鐵甚旺富強遂甲天下中國金銀煤鐵各礦勝於西洋諸國祇以風氣未開菁華闕而不發利源之涸日甚一日復歲出鉅款購用他國煤鐵實為漏卮之一大宗從前江西之樂平及山西湖南等省皆以土法開采煤鐵等礦工力較繁而所得較微無裨大局近來如臺灣之基隆湖北之荊門安徽之池州經營煤礦漸用洋法然或因創辦伊始或因經費未敷尙難驟得大效臣於光緒元年四月間欽奉

奏稿四十

聖

寄諭著照所請先在磁州試辦派員妥為經理等因欽此仰見

朝廷恢拓遠圖至意旋經屢次委員往查磁州煤鐵運道艱遠又訂購英商鎔鐵機器不全未能成交因而中止旋聞灤州所屬之開平鎮煤鐵礦產頗旺臣飭招商局候選道唐廷樞馳往察勘攜回煤塊鐵石分寄英國化學師鎔化試驗成色雖高低不齊可與該國上中等礦產相仿采辦稍有把握三年八月臣檄派前任天津道丁壽昌津海關道黎兆棠會同唐廷樞熟籌妥辦旋據酌擬設局招商章程十二條批令刊刻施行迨丁壽昌黎兆棠先後離津現任津海關道鄭藻如復會辦局務查初定章程擬招商股銀八十萬兩開采煤鐵並建生熟鐵鑪機廠就近鎔化繼因招股驟難足額鎔鐵鑪廠成本過鉅非精於鐵工者不能位置合宜遂先專力煤礦采煤既有成效則鍊鐵必可續籌也唐廷樞奉檄設局

後勘得灤州所屬距開平西南十八里之唐山山南舊煤穴甚多
土八開井百餘口只取浮面之煤因無法取水而止光緒四年鑽
地探試深六十丈得有高煙煤六層第一層厚十八寸第二層二
尺第三層七尺第四層三尺第五層六尺第六層八尺其第六層
之下尙有一二層但計所得之煤已足供六十年之用因是不復
深探旋於五年購辦機器按西法開二井一提煤一貫風抽水其
提煤井開深六十丈貫風抽水井開深三十丈地下開橫徑三道
一在提煤井二十丈開洞門作旋風之用一在三十丈一在五十
六丈兩道係取煤之用所有地下橫徑直道均與兩井相通其第
一條橫徑南開四丈得見第一層煤質略鬆煤層過薄豫備不用
北開八丈得見第二第三層煤兩層相隔只有一尺其質堅色亮
燃燒耐久性烈而蒸氣易騰燒燼之灰亦少就目下二十丈深之

奏稿四十

聖

煤論之可與東洋頭號煙煤相較將來愈深愈美尤勝東洋惟煤
產出海銷路較廣由唐山至天津必經蘆臺陸路轉運維艱若夏
秋山水漲發節節阻滯車馬亦不能用因於六年九月議定興修
水利由蘆臺鎮東起至胥各莊止挑河一道約計七十里爲運煤
之路又由河頭接築馬路十五里直抵礦所共需銀十數萬兩統
歸礦局籌捐非但他日運送煤鐵諸臻便利抑且窪地水有所歸
無虞積澇而本地所出鹽貨可以暢銷是一舉而商旅農民皆受
其益所佔地畝均照民價購買本年二月興工挑挖五六月可一
律告成從此中國兵商輪船及機器製造各局用煤不致遠購於
外洋一旦有事庶不爲敵人所把持亦可免利源之外洩富強之
基此爲嚆矢據總辦開平礦務局員唐廷樞將大略情形具稟前
來臣查唐廷樞熟精洋學於開采機宜商情市價詳稽博考胸有

成竹經理數年規模龐備當夫籌辦之始臣因事端宏大難遽就緒未經具奏今則成效確有可觀轉瞬運煤銷售實足與輪船招商機器織造各局相爲表裏開煤既旺則鍊鐵可以漸圖開平局務振興則他省人才亦必聞風興起似於大局關係非淺所有直境招商購器開辦礦務疏通運道緣由理合恭摺具陳伏乞

皇太后

皇上聖鑒謹

奏

請減出口煤稅片

光緒七年四月二十三日

再據候選道唐廷樞稟稱開辦礦務局以來購備機器延訂洋匠工司及買地築路挑河經費約共用銀七十餘萬兩成本既重煤價亦因之而昂若再加現定之稅額卽難敵外洋之煤其勢必不能暢銷而關稅亦鮮有實獲與其稅重而少所收不若減輕而多所納中國原定洋貨稅則過輕土貨稅則較重以致華商疲累難與洋商頡頏查西洋各國通例於外來進口貨稅無一不重於本國出口貨稅無一不輕所以徵外人之利而護本國之商斟酌損益實有至理乃中國初定約時爲外人所蒙轉使外洋進口之貨稅輕內地出口之貨稅重不啻抑華商而護洋商此通商後數十年之流弊隱受厥累而不覺者也卽以煤斤而論洋煤每噸稅銀五分土煤每担稅銀四分合之一噸實有六錢七分二釐若加復

奏稿四十

四

進口半稅已合每噸銀一兩有奇盈絀懸殊至二十倍之多前兩江督臣沈葆楨於臺灣基隆開煤時奏准土煤每噸徵稅一錢較洋煤業已加重嗣湖北用機器開采亦奉

諭旨准照臺灣稅則在案揆從前嚴定土煤稅章之意或恐煤稅減輕則土煤出口日多內地煤價必長故特重其稅以示限制惟是土法采煤只能售於近地若從陸路重運出口腳價太重斷不合算況其所采浮面之煤實不足供輪船製造等用如直隸西山等處煤產專濟五城內外之需並無轉運來津者是其明證似多運出口身節本可無慮今開平煤礦全用西法每日出至五六百噸之多據洋師測量足供六十年采取除運往要口分供各局及中外輪船之用並可兼顧內地民間日用刻下運道疏通腳價既省若再將稅則減輕煤之售價必廉可以暢銷無滯而運售於各

局者不致再用洋商昂貴之煤其有裨於公款不少等情前來臣復飭津海關查取歷年洋煤土煤進口數目開具清單自同治十年起至光緒六年止洋煤進口計八萬一千五百餘噸土煤進口僅五千五百餘噸而出口土煤則天津向所未有蓋由稅則厚薄不一土煤壅滯難銷遂使厚利爲洋商所壟斷若不變通設法更定章程殊非通籌理財之大計合無仰懇

天恩俯准開平出口煤斤按照臺灣湖北之例每噸徵收稅銀一錢以恤華商而敵洋煤庶風氣日開利源日旺而關稅亦必日有起色矣理合附片具陳伏乞

聖鑒訓示謹

奏

請開平泉銅礦片 光緒七年四月二十三日

再天津機器各局製造子彈藥帽等項所需銅料購自外洋轉運艱而價值貴且恐不可常恃自應就中國自有礦產設法開采以期費省用便前據儘先題奏道朱其詔查得承德府平泉州屬鉛銅子溝地面本有銅礦於咸豐三年招商采辦旋以硎老奏明封閉實則當時僅用土法不能抽去硎水遂遽停歇並非硎老砂空今檢取砂石交機器局分化其中確有銅質成色尙佳可合製造之用當飭該道帶同熟悉礦務之職員會溥前往詳細察勘籌辦並與臣崇綺分飭地方官彈壓照料茲據該道覆稱該處銅苗頗旺雖硎水較深只須機器抽去仍可開采應在二十里外之丫頭溝起造廠房安設鍋鑪融鍊無礙民居廬墓已將礦山廠地向業戶租定酌雇工匠及附近民夫開挖一面訂購西洋抽水起重吹

奏稿四一

四

風等項機器陸續運往應用由該道招股集資試辦等情到稟前來臣查鉛銅子溝既有銅礦可資采鍊其成色甚合製造之用自應照議試辦卽歸機器局收買以興地利而濟軍需俟確有成效再行安定章程所有委員試辦平泉州銅礦緣由理合會同熱河都統臣崇綺附片具陳伏乞

聖鑒謹

奏

吳仲翔辦理學堂片

光緒七年四月二十三日

再北洋陸續籌購蚊快鐵甲等船所有管駕大副二副管理輪機
礮位人員需材甚眾其作養造就之法以練船為基址尤必以學
堂為根源臣於去年七月奏請

飭派前船政大臣光祿寺卿吳贊誠駐津督辦水師學堂練船事
宜奉

旨允准在案旋經吳贊誠於天津機器局河東一帶勘定學堂地
基遴派局員繪圖估料剋日興工一面酌定規條招考學生入堂
肄業吳贊誠於去冬回南就醫順便赴滬選募學童茲據咨稱舊
疾增劇不能轉動難期痊愈學堂事體繁重為造就水師人才張
本關繫海防要務若以病軀從事恐致貽誤懇代奏開去差使另
派能員接辦以重要公等情前來臣查水師學堂創辦伊始吳贊

奏稿四十一

四十一

誠既因病篤不能前來亟須遴員接替查有二品銜分發補用道
吳仲翔久充福建船政提調條理精密任事勤能熟諳製造及駕
駛學堂事宜昨經船政大臣黎兆棠奏明給咨赴部引

見道出天津臣稔知其於兵船規制諳練已深擬暫留津差遣派
令總辦水師學堂練船事宜以資臂助俟籌辦就緒再由臣奏咨
赴部是否有當附片具陳伏乞

聖鑒訓示謹

奏

滿三德請加副將銜片

光緒七年四月二十三日

再據山海關道續昌稟稱稅務司滿三德從前幫同戈登帶兵隨官軍打仗出力蒙

恩賞給二等寶星該稅司屢稱感激圖報本關募設洋鎗隊經該稅司督飭操練自在關當差以來已蒙

天恩賞給三品銜惟西洋風氣以武職爲尤榮可否懇給武官虛銜等情前來臣查山海關稅務司滿三德既曾效力行閒又嘗教練鎗隊著有微勞值此時事多艱正宜牢籠遠人以備任使可否仰懇

恩施賞給稅務司滿三德副將銜用示激勵理合附片陳請伏乞

聖鑒訓示謹

奏

請緩蘆課奏銷摺 光緒七年四月二十三日

奏為援案請緩長蘆本屆正課奏銷以恤商艱恭摺仰祈

聖鑒事竊據長蘆鹽運使如山詳稱蘆商正課例限五月奏銷自

同治十年後商情艱窘經詳請

奏准緩至十月啟徵茲以例限將屆催令各商完納據通綱商人

晉有字等稟稱如果銷路漸暢積困稍舒自應依限輸將何敢瀆

求展緩無如前數年直豫大災人民流徙未復各岸銷數減少上

年冬雪未透今春雨澤愆期遂致硝鹽偏地官引益滯標項更絀

河路亦復淺阻現正竭力設法籌辦春運其去歲未完帑利及帶

徵正課亦均到限於辦運喫緊之際又須完此數款情形甚屬拮

据本屆正課奏銷實難依限籌措籲懇援案展緩該運司詳加體

察委係實情仍議緩至十月啟徵等情具詳請

奏稿四十

兪

奏前來臣查長蘆正課前因商情艱窘疊請展緩均經奉

旨允准現值餉需支絀但可依限催納不容稍事稽延實緣災荒

之後元氣未復又值冬春雪雨稀少地產硝鹽各岸銷數益滯課

運同時併辦力有難支自應援照歷屆成案籲懇

天恩俯准將光緒七年正課奏銷緩至十月辦理屆時當督飭運

司認真催徵以濟京奉各餉不致貽誤理合恭摺具

奏伏乞

皇太后

皇上聖鑒訓示謹

奏

營口練軍責成關道摺

光緒七年四月二十七日

奏為營口原設練軍仍應責成山海關道統帶以重口岸而一事權恭摺仰祈

聖鑒事竊據山海關道續昌稟稱營口練軍洋鎗隊五百名原為通商口岸彈壓巡防而設向歸該關道統帶今因照章挑放隊官名缺奉將軍岐元副都統富陞會劄以該軍已有副都統博崇武統帶協領依克津布管帶其公事須由依克津布呈由博崇武核轉該關道既未移交營務又擅自放缺公文內仍有統帶字樣謂不成事現飭依克津布回省將該關道改為管帶仍歸博崇武統帶等因該關道因另派統帶與奏定章程不符且各營管帶應歸統帶官統屬而副都統向無統屬司道體制但既奉會劄詰責已將營務移交博崇武接統等情稟報前來臣查同治五年營口添

奏稿四十

五十

設練軍洋鎗隊五百名曾經總理各國事務衙門奏稱專為防護營口之用與奉省地方原有各營絕不相涉應令改設之山海關兵備道統帶調撥歸通商大臣督飭妥辦並謂該處中外交涉事繁有此兵隊既可鎮壓賊匪亦可針制外侮且練兵以籌餉為先該關道管理稅課正可兵餉兼籌事權不致紛歧等因奉

旨允准欽遵在案嗣經三口通商大臣崇厚奏加該道海防練兵翼長名目督練官兵並據前關道俊達議定章程二十六條所有營總管帶等官即以防守尉等充當尋常營務悉由關道主持緊要事件該關道稟請通商大臣將軍核示是此項練軍統帶係奏明隨道缺而設具有深意迄今循辦十餘年並無貽誤上年八月

欽奉

諭旨僅令岐元酌撥旗營練兵派員往營口扼紮交博崇武統帶

岐元已撥給博崇武原練捷勝營旗兵六百名今富陞等遽改定章將該關道所統練軍亦交博崇武統帶凡挑放隊官等事皆不許該道與聞不特與總理衙門原奏迥不相符且營口爲通商要區人情本極浮動關道乃華洋觀瞻所繫向須責以備兵除此練軍五百名又無他兵可調無端撤其統帶必致駭人聽聞遇事掣肘呼應不靈實屬有礙大局臣統轄三口商務防務欽遵本年四月初八日

諭旨安籌兼顧勢難聽其隨意更變致誤事機該關道續昌明練樸誠辦事穩妥到任後察知官兵頗有習氣已設法逐漸整頓並刪除浮費樽節餉需尙稱得力所有營口原設練軍洋鎗隊五百名應仍責成該關道續昌統帶認真督飭營總管帶各官實力訓練務除積習用備緩急老弱弁兵隨時裁汰節出餉項另備籌築

奏稿四十

五

礮臺之需其尋常營務照章歸該關道經理分報通商大臣將軍衙門遇有緊要事宜稟請臣酌核調度至博崇武應令專統捷勝營旗兵隨時與該關道會商聯絡以符定制擬請

旨敕下岐元轉飭博崇武一體遵照理合恭摺由驛具陳伏乞

皇太后

皇上聖鑒訓示謹

奏

鐵甲籌款分別續造摺

光緒七年四月二十七日

奏爲訂造鋼面鐵甲第一號船按期匯價辦有端緒現擬分別續造豫籌要款恭摺仰祈

聖鑒事竊臣前經疊次奏明函屬出使德國大臣李鳳苞訪查各國船廠酌定新式訂造鐵甲船二隻所需船價計得福建解存上海銀六十萬兩部餉三十萬兩出使經費兩次借撥六十萬兩合共一百五十萬兩所短之數擬再陸續籌撥又以中國洋面將及萬里鐵甲兩隻不敷分布尙應續造二號請撥准商捐項一百萬兩招商局分年拔還官款一百萬兩抵作訂造鐵甲之需均奉旨俞允上年六月十月開准戶部兩次議覆合將准商捐銀四十萬兩先行撥給應用其餘訂船不敷之數俟酌定船價應分幾次勻付奏報到日再行酌撥總期無誤要需等因奉

奏稿四十

五

旨依議欽此行知遵照各在案臣卽電屬李鳳苞悉心考校迅速定議疊據李鳳苞函報在德廠訂造鋼面鐵甲一隻核計初次請撥兩船之款本多短絀今因新式價昂不敷之數更鉅臣於上年十二月議覆梅啟照海防條陳摺內請

旨飭下總理衙門戶部迅爲籌撥的款迄未奉有覆准明文伏查各國鐵艦之式日出日新與其價廉而得已舊之船臨事難操全勝不若價昂而求最新之式先聲已足奪人今核李鳳苞所訂德國伏耳鏗廠船式爲交戰大洋及守護海口之用兼有水下碰船之鐵角喫水深十九尺每一點鐘行十四海里半合中國四十六里有奇中腰水綫處鋼面鐵甲厚十四寸前後至首尾皆用鐵甲其艙面對角處有兩圓臺亦鋼面鐵甲厚十二寸約十八箇月造成李鳳苞復與參贊徐建寅彙集各國新式詳稽博訪去短取長

如轉動之靈捷衝碰之猛利浮力之寬裕礮位之合宜隔堵保護之周密引水導氣之流通下至一板一釘厚薄疏密無不精益求精蓋在中國海面所用之鐵艦斷推此種爲上等矣又據李鳳苞面稱如南北洋合購四船約估價目第一船於光緒六年十一月在德購定勻分四期付價至光緒八年六月交船付訖該船配克鹿卜十二寸口徑後膛礮四尊八九寸口徑後膛礮首尾二尊又分兩期付價加配雷艇電燈連珠礮魚雷裙網等件及驗工查料雇員駛回保險及生徒舵水各薪費約共需八百七十萬馬克卽四十三萬英鎊以每鎊三兩八錢折算合銀一百六十三萬兩有奇其第二船現方屬英法廠主赴德面議但英法工貴價必較昂如果太昂擬仍在德廠續訂以節糜費籌備亦不可再遲合計第一第二兩船之價需費已在三百二十六萬兩以外至第三第四

奏稿四十

至

兩船將來須赴英法廠另造其價稍浮惟南北洋各備兩艘數已至少或可稍爲改易萬不可減小其式大約照式續造兩艘並一切隨件薪費約其需九十萬英鎊合計銀數又在三百四十一萬兩以外各等語臣查上年六月初五日欽奉

上諭著照所議查照新式訂造鐵甲二隻該督迅卽知照李鳳苞速行定議早日造成不可耽延時日至北洋空虛應再定造鐵甲二隻俾資分布等因欽此是前後擬訂鐵艦四隻實屬中國必不可少之事久在

聖明洞鑒之中惟值此籌款維艱臣再四籌思必須分年續造以紓餉力現計初次擬造二船僅得有著之款一百五十萬兩核以李鳳苞所開款目尙短一百七十六萬餘兩除已定一船業飭江海關道劉瑞芬於上年九月本年三月兩次電匯英銀二十六萬

鑄約合銀九十七萬餘兩外臣頃又懷遵不可耽延之

諭旨電致李鳳苞屬照現定銅面鐵甲原式再訂一船洋廠合同一經議定價銀即須如期分匯未便失信於人使承辦之員稍有掣肘而上海鑄價時有漲落必先儲備實銀俟鑄價稍低或電匯現銀或豫買鑄票分起匯寄乃免喫虧臣擬將准商捐項四十萬兩挪後就前作此次購船之用其應續繳六十萬兩依限於五月內可以交清擬請

旨敕下戶部全數撥作船價以符原議並請

敕下兩江督臣轉飭兩淮運司委員解交江海關道收存以便隨時匯寄又屢接四川督臣丁寶楨來函每以東北海防爲念亦勸速購鐵甲練成外海水師去歲俄約未定聞丁寶楨會奏請籌餉三十萬兩撥解臣屢募勇操練防護

奏稿四十

五

京畿事雖未行而其公忠體國之忱令人敬服今購利器以治水師實於中國自強之機關係尤鉅可否

敕下丁寶楨就川鹽官運局分批籌撥船價銀三十萬兩解交北洋助成盛舉以上二款如蒙

准撥約尙短銀四十六萬餘兩容臣再於北洋海防經費及淮軍

額餉內先其所急通籌挪湊隨時補苴如此則初造二船可刻期

告成矣至續次擬造二船除將鹽捐百萬兩挪用在內僅有招商

局繳款百萬兩臣初擬該局每屆可拔還官款三十五萬兩則收

至第三屆可以足數嗣據局員唐廷樞等詳報承運本屆各省漕

糧應支水腳等項解還官款共僅銀二十九萬餘兩約略計算須

至第四屆方能收足百萬之數是一時尙難就緒擬俟二三年後

伊犁償款歸清各省財力稍寬屆時再酌度情形奏明請

旨敕下總理衙門戶部籌撥的款定期續造庶水師之規模漸擴
藉可禦外侮而壯聲援除將李鳳苞寄到第一號鐵甲合同船式
章程鈔咨總理衙門查核外所有現擬分別續造豫籌要款緣由
恭摺由驛馳陳伏乞

皇太后

皇上聖鑒訓示謹

奏

商局官款撥購鐵甲請緩撥還片

光緒七年四月二十七日

再欽奉三月十二日

寄諭譚鍾麟奏招商局借撥浙江塘工生息經費銀三十萬兩每年應還銀六萬兩請飭扣還等語著飭招商局於本年承運浙漕腳價項下由浙省糧道扣還本銀六萬兩等因欽此遵查輪船招商局原存各省官本銀一百七十八萬一千五百兩前經奏明於該局承運蘇浙江鄂漕糧應得水腳項下勻分五屆每年撥還一屆銀三十五萬六千三百兩係按該局每年運米六十六萬石而言現在江西停運本屆只承運蘇浙湖北漕米五十餘萬石共得水腳漕平銀二十九萬餘兩按各省原撥官本銀數分攤浙江只應攤還銀四萬九千餘兩並無六萬兩之多且購辦鐵甲船需款緊要臣已於上年六月奏請酌提招商局三屆還款銀一百萬兩

奏稿四十

五

零抵作訂造鐵甲之需奉

旨允准欽遵在案查鐵甲船為南北洋海防要需關繫軍國大計本應由各省協力籌措因現款難籌不得不酌提招商局還款應急臣業將現訂兩號並擬續訂兩號情形價目另摺詳陳計續訂兩號約需銀三百四十餘萬現僅指招商局還款一百萬兩其餘二百四十餘萬尚無著落若再將此款撥還各省則船價更無所出自應仍遵上年六月

俞旨酌提以符原案現計該局運漕水腳每屆既無三十五萬餘兩約須四屆方能提足百萬所有浙江塘工現需歲修經費應由該撫臣暫行另籌濟用俟提足船價百萬後再行扣還各省歸款庶海防利器稍資購辦而各省借撥局款亦不至全虛除分咨查照外理合附片覆陳伏乞

聖鑒訓示謹
奏

奏稿四十

五七



李文忠公奏稿卷四十

卷之四十一目錄

覆陳直隸河工情形摺 光緒七年五月二十日

酌改三廳移兵控扼摺 光緒七年五月二十日

堵築東明黃河決口摺 光緒七年六月初九日

東明移設廳汛協撥經費片 光緒七年六月初九日

大清滹沱各工完竣摺 光緒七年六月初九日

瀕龍河並千里隄工片 光緒七年六月初九日

李鳳苞仍賞花翎片 光緒七年六月初九日

請獎王得勝片 光緒七年六月初九日

兵差報銷酌議章程摺 光緒七年六月初九日
附清單

遵議鴉片釐稅事宜摺 光緒七年六月十六日

議設洋藥公司片 光緒七年六月十六日
奏稿四十一目錄

創設公司赴英貿易摺 光緒七年六月二十日

王德均暫緩赴吉片 光緒七年六月二十日

職官勾串洋人強詐摺 光緒七年六月二十日

修竣津城濠牆摺 光緒七年七月十五日

飛虎船救護壞船請獎片 光緒七年七月十五日

籌濟吉林機器片 光緒七年七月十五日

李朝儀政績摺 光緒七年七月十五日

裁遣靈營片 光緒七年七月二十九日

巴西增刪條約摺 光緒七年閏七月初八日
附節略二件


請催粵海關欠解海防經費摺 光緒七年閏七月初八日

熱河圍場移駐弁兵摺 光緒七年閏七月初十日

釐定商船津貼摺

光緒七年閏七月初十日

奏稿四十一目錄



李文忠公奏稿卷四十一

全集一之四十一

桐城吳汝綸編錄

覆陳直隸河工情形摺

光緒七年五月二十日

奏爲覆陳直隸河道地勢情形節次辦法恭摺仰祈

聖鑒事竊臣欽奉光緒七年二月三十日

寄諭左宗棠奏擬調馬步各營興修水利等語據稱順天府山直隸正定等處近年地勢迥異從前不修水利則旱潦相尋民生日蹙治水之法下游宜令深廣上游宜多開溝洫擬令所帶現紮張家口各營移治順天直隸上游水利其下游津沽等處仍由直隸總督經理著李鴻章董華李朝儀將各該處地勢情形及應如何辦理之處會同籌議具奏等因欽此並准順天府臣咨請主稿會奏前來伏查近畿水利關繫

奏稿四十一

國計民生興修無待再計臣莅直以來疊經察酌籌辦未敢稍涉漠視惟限於地勢財力河淀又受病過深有難盡利無害者溯自宋元迄明代有興作實效鮮聞惟北宋何承矩就雄霸等處平曠之地築堰爲障引水爲塘率軍屯墾以禦戎馬專爲設防起見今之東西淀皆其遺址維時河朔本多曠土堰外卽屬敵境聽其旱澇無關得失故可專利一隅厥後人民日聚田疇日闢野無棄地不能如前之佔地曲防故治之之法亦復不易我

朝康熙雍乾年間屢蒙

聖祖仁皇帝

高宗純皇帝巡行規畫指授機宜疊

命賢王重臣董理其事先後歷時數十年官民用費千百萬濬築兼施節宣備至始克奏功然旱澇仍不能免卽如雍正四年甫報

工竣而五年夏秋永定等河漫決多口各屬被水者三十餘州縣其營成之水田又因缺雨難資灌溉未幾而多改旱田蓋河道本來狹隘既少餘地開寬土性又極鬆浮往往旋挑旋塌且渾流激湍挾沙壅泥沙多則易淤土鬆則易潰其上游之山槽陡峻勢如高屋建瓴水發則萬派奔騰各河頓形壅漲汛過則來源微弱冬春淺可膠舟迴不如南方之河深土堅能容多水源遠流長四時不絕也伏讀乾隆二十七年十一月

高宗純皇帝諭曰從前近畿議修水利營田未嘗不再三經畫始終未收實濟可見地利不能強同等因欽此

聖謨燭照洞見本原此往事之可考而知也乾隆以後未興大役道咸以後軍需繁巨更兼顧不遑卽例定歲修之費亦層疊折減於是河務廢弛日甚凡永定大清滹沱非運南運五大河又附麗

奏稿四十一

五大河之六十餘支河原有閘壩隄埝無一不壞滅河引河無一不塞其正河身淤墊愈高永定河在雍乾時已漸高仰今視河底竟高於隄外民田數丈昔人譬之於牆上築夾牆行水非一日已而節宣西南路諸水之南泊北泊節宣西北路諸水之西淀東淀又早被濁流填淤或竟成民地其河淀下游則僅恃天津三岔口一綫海河迎暹出口平時既不能暢消秋冬海潮頂托倒灌自胸膈腸腹以至尾閘節節皆病是以每遇積澇盛漲橫衝四溢連成一片順保津河各屬水患特重此同治十年前後之情形也曾國藩莅直時首以治河爲務而未克興辦大工臣接任後適值連年大水疊次遴員周歷勘驗並隨時親自察度詳稽往牘博采羣言求所以修治五大河東西淀之法蓋五大河爲一省之綱東西淀爲各河之匯須先從此入手若房山正定一帶尙非急切者五大

河中以永定河之害爲最深然盧溝以上束於兩山之閒向無工程其病實在盧溝以下須挑去二百餘里中淤一二丈之積沙方能順軌否則以南隄爲北隄而改河使南岸築南隄以障之亦可安流弭節而去此二策者勞費皆不可勝計若挑去全河極厚之積沙自來無此辦法亦無出沙堆積之處若改南隄爲北隄則固安永清兩縣城近靠南岸須議遷建尤於民情不順其大清北運南運則須分別挑濬河身加築隄埝修復閘壩減河始保安瀾統計工程皆極繁巨萬萬無此財力滹沱趨向無定自來不設隄防同治七年由藁城北徙以文安大窪爲壑其故道之難復上游之難分下游之難洩曾國藩與臣均詳陳有案東西淀寬廣百數十里淤泥厚積人力難施此費鉅工艱不能大辦之情形也考之往事既如彼揆之今情又如此臣目擊時艱既不敢籲求巨帑於

君父又不忍坐視顛沛於民生只有逐漸設法量力補救豈有畏難苟安任其自盈自涸之理頻年以來修復永定河金門閘及南上北三灰壩以資分洩裁灣切灘以紓溜勢加築隄段添備麻袋土車以助搶險大清河則於新雄境內開蘆僧滅河於霸州文安境內接開中亭河勝芳河以分洩上游盛漲於任邱開趙王滅河以分洩西淀盛漲並將隄埝分別修築今年又於文安左各莊至臺頭挑挖河身二十六里寬十餘丈深丈餘以暢下游去路滹沱河則於河閒及文安窪酌開引河兩道今年又於獻縣朱家口呂關減河三十餘里均歸子牙河達津以輕河獻任雄霸保文大積患北運河則於通州築壩挽復潮白河歸槽不使橫溢於香河王家務武清筐兒港修復石壩以減漲水於天津霍家嘴疏濬引河以通下口今年又於武清寶坻境內挑挖筐兒港王家務兩減河

河身以資暢洩南運河則於青滄靜海等處修復隄工二百餘里因東境四女寺哨馬營直境捷地興濟四處減河久廢遂於靜海之靳官屯另開減河六十餘里使別途出海不併注於津河又於天津城東永定大清滹沱北運交會之陳家溝開河百餘里以分洩四大河之水逕達北塘入海庶免海河過於壅滯其無深蘆博高陽一帶則堅築豬龍河隄以防滹沱北越任邱至天津一帶則加築千里隄格淀隄使河自河而淀自淀西沽韓家樹上至東淀則用西洋機器船節挖淺水路已通又於廣平開沼河順德挑澧河趙州濬沚槐午河及此外各屬河道隄壩受害較深者亦隨時酌量疏築並令地方官民於無礙運道官隄之處或擇開溝洫或厚水灌地有泉源者察看疏濬距河遠者開鑿井眼若河閒府屬井工則係專案辦理以上歷年所需工費除勻撥賑款捐項以

奏稿四十一

四

工代撫外並抽調淮練各軍分助挑辦淮軍統領周盛傳更於津東之興農鎮至大沽創開新河九十里上接南運減河又於減河兩旁各開一渠以便農民引灌其興農鎮以下又開橫河六道節挖溝引水營成稻田六萬畝且耕且防海疆有此溝河亦可限戎馬之足此臣頻年就賑捐兵力竭蹙經營之情形皆有奏牘可稽者也自來河道必須上下游並治是以臣於各河上游或修復閘壩酌開減河以資分洩下游或挑濬正河添闢減河以暢去路近年順保津河各屬水患較輕尙不致橫衝四溢連成一片但值廢弛已甚之後官民交窘之時迥與康熙雍乾年間情事不同僅能量力補苴實無從更張大舉若欲使各河一律順軌則必籌定鉅費先將永定河自盧溝以下二百餘里改河築隄可保數十年無患又將大清河雄縣一帶之淤窄挑寬濬深北運南運河卑薄

未補之隄埵淤廢未復之減河分別加修東西淀南北泊及津東之塌河等淀爲節宣諸水之區尤宜設法疏濬使可容受蓄洩並將西淀上游蠡高境內之潞龍河淤窄挑濬寬深再次則酌修各屬支河及畿東之薊運等河務使脈絡貫通經緯畢具悉去胸膈腸腹尾閘之病然後廣開溝洫相濟爲用庶水害旣除而水利可與不致此旱被澇此盈彼涸惟統計最要次要各工甚巨卽如永定一河若照議興辦土方不知凡幾其一切開壩物料工用器具佔用旗民地等項爲費亦復不貲實非數營兵勇所能辦到臣部淮練各營僅二萬餘人分紮海防邊防及內地各要隘修築礮臺彈壓地面緝捕盜賊各有專司只能抽暇就近酌調助役勢難全撤要防停罷操巡以致顧此失彼今年落文安之大清河開獻縣之滹沱減河挑寶坻武清之北運減河並於高陽修潞龍河隄任

奏稿四十一

五

邱修千里隄全賴東南各省官紳集捐協助始克就緒然已竭忠盡歡此後斷難爲繼本省向係缺額入不敷出更無餘款可籌儻能如康雍年間故事約計現在應辦工程先行由部撥年撥給銀百餘萬兩自可分投勘議招雇民夫助以兵勇及時擇要辦理次第興作惟部庫拮据外省支絀伊犁償卹等項尙待籌付竊恐一時難集鉅款似仍只能量力籌辦未便剋期奏效左宗棠以所帶各營移治上游正可輔直力之不逮前已咨請飭挑涿州北關外拒馬河淤沙以試其端並經左宗棠不辭勞瘁親履察勘惟本屆伏汛將臨盛漲卽至難再別施畚鍤此後應修何處卽由左宗棠察酌隨時會商當飭地方印委實力襄助相與有成微臣忝司守土兼任河工責無旁貸昨已督飭司道詳確勘議無論上游下游仍當統籌兼顧盡其力所能行以期逐漸補救惟賑捐旣已停止

本省又無款項可籌將來必不可少之工需只可奏懇由部酌撥以資接濟此現時統籌酌辦之情形也正在具摺間接准部咨以左宗棠前奏水利事宜業經醇親王遵奉

懿旨覆奏蒙派恭親王醇親王會同左宗棠及臣等妥議奏辦等因仰見

朝廷慮念民生慎重水利至意除鈔摺咨呈恭親王醇親王並咨左宗棠酌核仍隨時會籌議辦外所有臣等原奉

寄諭統籌酌辦緣由合先會同兼管順天府府尹臣童華署順天府府尹臣張凱嵩恭摺由驛覆陳是否有當伏乞

皇太后

皇上聖鑒訓示遵行謹

奏

酌改三廳移兵控扼摺

光緒七年五月二十日

奏爲口外張獨多三廳地方甚關重要今昔繁簡情形不同請將理事廳員酌改撫民要缺並於多倫移駐武職大員添設三廳捕盜兵弁以資控扼恭摺仰祈

聖鑒事竊照宣化迤北之張家口獨石口及塞外之多倫諾爾向設理事同知各一員管理滿蒙漢民事件縣丞巡檢數員或分防地面或經理獄務張家口獨石口各設副將一員佐以都司千把等官多倫則僅都司一員千把總三員其原定廳員缺分及多倫營制本從簡約在地方無事之時已覺不甚得力自口外荒地漸開遠近流民日益趨附馬賊亦出沒靡常近年盜劫獄訟之繁數倍往昔張獨兩廳所管地面皆在口外本甚遼闊東通熱河圍場西北接連察哈爾及蒙古各游牧而多倫諾爾更在張獨之北距

奏稿四十一

七

宣化五百里所屬之白岔經棚且距宣化千里鎮道皆駐口內勢難兼顧其地界與圍場游牧處處犬牙相錯白岔經棚西北兩面又有至庫倫瀋陽之商路及吉林黑龍江入關必由之大道路徑分歧四通八達控制極難圍場素爲盜藪原設各滿蒙卡倫又久廢棄於是盜賊橫行劫財傷人之案無時不有商民深受其害臣於去夏商派前甘州提督曹克忠前往該三廳察勘形勢飭宣化鎮總兵王可陞暫撥練軍馬隊兩營分往獨石口至多倫爲一路多倫至白岔經棚爲一路擇要巡緝搜剿賊蹤漸戢然必地方文武得人乃可常資整理查張獨多三廳均屬京北邊外緊要地方外防先宜內治近既荒地日闢民居日多無字催科聽訟捕盜極應慎重且現定中俄新約張家口准俄民建造鋪房行棧此後交涉事件益繁並准俄商由尼布楚運貨至張家口據曾紀澤爾稱

尼布楚入邊後必從喇嘛廟卽多倫諾爾行走是該處緝捕巡防尤爲當務之急庶免滋生事端貽人口實臣悉心籌度並據藩臬兩司口北道具詳約有應行變通者三端一擬將該三廳改爲撫民同知要缺向例張家口獨石口同知缺出以候補理事同知請補如候補無人由吏部於記名理事人員內揀補多倫諾爾同知缺出於現任候補理事人員內調補惟此項候補記名理事人員往往僅能繙譯清漢文字而於地方之利弊民生之休戚茫然不知並有因精力就衰才具平庸改銓此職者以未諳民事之員遽令理繁治劇貽誤實多該廳近年情形實係衝繁疲難非素有歷練通曉政體民情長於緝捕之員斷難勝任應請嗣後均改爲撫民同知要缺並酌照熱河奉天各州縣滿漢兼用成案遇有缺出於直隸通省滿漢同通州縣實缺候補中擇其人地相宜者分別

奏稿四十一

八

升調請補仍令該管口北道嚴加督飭隨事認真整頓庶吏治漸有起色其原有佐雜等官應循其舊一擬於多倫廳移駐武職大員該廳孤懸塞外幅幘寬廣非係山溝卽屬草地前據曹克忠勘覆其閒要隘甚多自多倫北至樺木溝大小克圖白岔經棚劉家營子一帶較張家口一路尤爲喫緊且與滿蒙各旗時有交涉事件非都司所能聯絡查張家口距宣化僅六十里宣化係總兵駐紮之所儘可就近兼管該口營伍且該口尙有察哈爾都統督率旗營駐紮不必再有副將分防應請將張家口副將移駐多倫作爲協守多倫諾爾等處副將會同該廳詳察地勢要隘酌撥分汛往來彈壓嚴緝盜匪保護商民仍歸宣化鎮統轄副將品秩較崇凡遇緝匪等事應令與滿蒙各旗會商妥辦勿任此拏彼竄其原設多倫營都司本歸獨石口副將管轄今應作爲多倫副將中軍

無庸再屬獨石口協標至張獨兩協汛地本屬毘連今張家口協改駐多倫應將該兩協原管營汛距多倫較近者歸多倫協副將管轄距獨石口較近者歸獨石口協副將管轄統令宣化鎮會商口北道督同該兩協酌量勻撥其原設多倫兵弁不敷卽由該兩協簡僻營汛內抽撥移駐或酌撥宣化練軍馬隊交該副將管帶駐防所有張家口協原有中軍都司卽作爲張家口營都司改隸鎮標統俟移撥事竣咨部立案應換文武各員印信並俟咨部換鑄應需多倫協副將衙署責成道廳樽節估辦至多倫協副將都司獨石口協副將張家口營都司均係要缺嗣後遇有缺出並請滿漢兼用由外揀選明幹耐勞巡防得力之員分別升調請補以期人地相宜一擬添設三廳捕盜弁兵查口外與內地情形不同非州縣馬快等役所能濟事是以張家口獨石口兩廳向例各設

奏稿四十一

九

捕盜營經制千總一員把總一員外委一員馬兵三十九名歸廳員管轄專司捕盜惟草地寬廣實屬不敷調撥應請添給張家口廳外委一員馬兵三十九名獨石口廳馬兵二十名多倫廳從前未設捕盜兵弁應請添設經制千總一員把總一員外委一員馬兵三十九名仍各歸廳員管轄調遣酌添營房器械擇要扼紮令與綠營弁兵認真巡緝儻敢通賊殃民卽按軍法從事遇有考拔弁兵額缺照舊由廳員詳道驗補咨司核轉應添俸廉糧乾等項由藩司照章核撥卽於各該廳經徵升科地糧內留支劃抵以免遠道請領跋涉之煩以上三端皆係因時制宜變通辦法期於邊要地方有裨是否有當理合恭摺具陳伏乞

皇太后

皇上聖鑒敕部迅速核覆施行謹

奏



奏稿四十一

十

堵築東明黃河決口摺

光緒七年六月初九日

奏爲堵築東明高村黃河南隄漫口大工及搶辦上下游險要工段一律完竣並遵保出力員紳恭摺仰祈

聖鑒事竊直隸東明縣黃河南隄於上年九月三十日霜清後高村奇險疊出漫刷成口當經分別參辦奏派道員用候補知府北運河務關同知吳廷斌前往會同大名鎮總兵徐道奎大順廣道劉盛藻安速勘籌堵築其時口門已及二百丈中有刷成串溝五六道水深五六尺及丈餘且大溜逼近口門勢甚洶湧日益衝刷必須挑開溜勢趕堵串溝並於隄裏先築套隄以期迅速合龍然後補築大隄卽據各該員親駐工次督率練兵民夫分投趕做於十一月初一日合龍其漫出之水僅由東明至東省荷澤鉅野嘉祥而止距運河南陽等湖尚遠絕無衝溢之患東明以下沿路水

奏稿四十一

十一

勢微弱亦無損傷人口並接山東撫臣周恆祺函稱平地漸次涸復窪處不過二三尺無礙大局當於十一月十二日

奏報聲明俟隄外泥水稍乾有土可取卽將補築大隄及一切善後事宜妥籌辦理其在事員弁紳董俟全工告竣查明保獎等因奉

旨允准欽遵在案臣飭該鎮道與吳廷斌詳加勘估應補築高村

大隄二百四十五丈七尺六寸底寬連埽靠十九丈六尺頂寬十丈高一丈六尺北首接築戢隄一百一十一丈六尺底寬二丈八尺至七丈二尺頂寬一丈八尺至六丈二尺高一丈二尺五寸迤北加築攔水斜埽二百四十丈底寬九丈頂寬四丈高一丈南首接築戢隄一百五十丈底寬三丈至七丈八尺頂寬二丈二尺至六丈八尺高一丈一尺八寸至一丈四尺大隄後身加築月隄一千

五百四十五丈底寬九丈頂寬三丈高一丈又前面南首加築頭道挑水壩三百丈底寬十一丈頂寬六丈高一丈二道挑水壩七十丈底寬九丈頂寬四丈高一丈又沿隄做水埽六十三段計長三百七十八丈寬四丈至六丈鑲出水面一丈頭道挑水壩做水埽九段計長四十五丈六尺寬二丈四尺至三丈鑲出水面一丈二尺旱埽五十九段計長二百九十五丈寬一丈六尺至二丈鑲高一丈二尺二道挑水壩做裏頭水埽三段圈長十五丈寬二丈鑲出水面八尺此高村新工辦法也上游李連莊下游黃莊皆溜偪隄根黃莊尤形危險應於李連莊大隄後身加築月隄二千八十丈底寬七丈五尺至十丈頂寬三丈至五丈高九尺至一丈前面河灘築攔水埽四百五十丈底寬八丈頂寬四丈高八尺其黃莊大隄後身原有月隄一千一百二十丈日久卑薄今加培底寬

十丈頂寬四丈高一丈一尺前面北首做挑水護隄壩二百六十六丈底寬八丈頂寬四丈高八尺南首築攔水埽三百九十丈底寬五丈至八丈頂寬一丈五尺至四丈高五尺至八尺沿隄做水埽九十一段計長五百四十九丈八尺寬四丈至六丈鑲出水面一丈此上下游李連莊黃莊加築工程辦法也去冬擇要趕辦之後今春開凍復調集練軍民夫分投興辦至四月初旬全工報竣臣委令候補道萬國順馳往逐細驗收據報丈尺有盈無絀築做均甚堅固層土層礮毫無草率偷減並據鎮道等查明出力員弁紳董請獎前來除酌定修防事宜另行具

奏並將用過銀兩俟查核明確開單

奏報外臣查東明黃河南隄關係東南運道民生甚巨若不即時堵合一經春融水漲勢必泛濫橫流爲害滋大是以嚴飭各員趕

緊搶辦甫及一月卽報合龍然其時正值西北風大作波浪翻滾水益擡高溜勢愈挑愈猛埽段隨鑲隨蝕串溝此堵彼陷情形甚爲喫重口門陡閉後大河全身側注幾有復潰之虞今年凌桃二汛大塊冰凌衝下河水屢次增長埽壩疊被塌沒各工岌岌可危幸經各員親率兵夫加勁趨做不分曉夜風雪出死力以相爭故能剋期成事一律完固各該員督率兵夫於寒天冰凍之中露體塗足力挽狂瀾開春後又搶辦該處及上下游隄壩埽段數千百丈其中水埽幾及千丈皆鑲出水面一丈鑲入水底二三丈統計工極繁重且甚艱難在事員弁及開東長三州縣紳董數百人兵夫萬餘人經歷七月餘之久日無休息膚裂趾腫履險蹈危罔惜身命實屬異常勞苦與躬冒鋒鏑者無異其所用經費皆核實摺節除練軍二千入向例不領工價外開用民力幫築月隄統計所

奏稿四十一

十三

省不少大名本無河工是以調用地方員弁而附近紳董亦皆奮勉趨公始終罔懈自應一併擇尤請獎謹分別開單恭呈御覽仰懇

天恩俯准照擬給獎以示鼓勵至道員用候補知府北運河務關同知吳廷斌搶辦全工力籌補救躬親督率倍著勤勞擬請

旨俟同知開缺後以道員補用其應給千把及五六品頂戴者咨月咨部註冊所有堵築東明高村黃河南隄漫口大工及搶辦上下游險要工段一律完竣並遵保出力員紳緣由理合恭摺具陳伏乞

皇太后

皇上聖鑒訓示謹

奏

再東明黃河地勢本係北高南下近年大溜愈趨愈南緊逼隄根以致高村李連莊黃莊頓成巨險今年二三月間疊次水漲壑埽齧隄黃莊尤爲岌岌皆經員弁竭力搶護始就平穩凌桃小汛如此伏秋大汛可知前有隄南十里外添築遙隄以爲門戶外障之議但工費太鉅直東均無此財力因飭鎮道等擇要修做月隄埽段藉資抵禦酌加挑水壩以冀挑開溜勢現已一律工竣此隄創立之初距河尙遠無甚要工每屆汛前抽調大名練軍前往修防酌量撥給料價霜降以後撤隊回營並無專員經管亦無撥定經費現在河流側注險工疊出情形迥異從前上年高村失事可爲鑒戒亟應變通辦理酌設廳汛專管俾可常年修守以重責成查大名漳河同知衙署原在東明嗣被黃水淹塌遂移駐大名龍

奏稿四十一

十四

王廟今尙賃屋而居漳河本無工程應令該同知仍回東明卽駐高村南岸適中之地作爲廳官專管東明全境黃河隄工並令漳河縣丞移駐上游李連莊開州州判移駐下游黃莊均作爲汛官分管該縣境內首尾各汛黃河隄工仍歸廳官督率該同知原有兼管地方事宜應循其舊漳河縣丞本任並無要務應卽專管黃河至黃莊係開州州判本管地面距原駐之處僅隔一河其本任事件無多仍可兼顧所有該員等廉俸役食等項循舊支給衙署月籌建蓋嗣後大名同知漳河縣丞開州州判三缺均作爲河工繁要之缺由司道遴選熟悉河務廉幹耐勞之員詳請酌補應否月鑄印信再核議詳辦現飭暫雇河兵數十名並於距隄十里內外村莊酌撥汛夫歸該廳汛調度派大名練軍步隊一營分駐各汛卽令營哨官會同該廳汛常年駐紮勤督兵夫講求修防東明

縣知縣應協同防守並經辦派撥汛夫等事仍歸大順廣道統轄節制認真督率廳汛營哨實力經理務於要工有裨儻大汛期內險工增多現有兵夫不敷應用卽由鎮道會商添調練軍馳往協防惟隄長六十里既經節節生險必應添辦料物責成廳汛營哨隨時設法修搶免誤機宜約計糶料一項每年需用一千五百萬斤其蘇繩樁樑等項稱是且河務繁重移駐各員原有廉俸不敷辦公均應酌給津貼以及河兵口糧汛夫方價一切雜項摺節合算每年必須銀四萬兩方敷應用直隸著名瘠苦庫藏奇絀民力拮据萬難全數籌撥此隄於直境僅止東明一隅利害實在東省是以前係升任山東撫臣丁寶楨建議資助興築既經設防於前自應同力合作共資保衛除今年防費暫由臣竭力湊用外擬請旨敕下山東撫臣自光緒八年起每年協撥修防經費銀二萬兩

奏稿四十一

十五

於頭年秋冬閒就近解交大名道庫以便乘料價平減道路乾燥之時購運工次其餘一半銀二萬兩卽由臣督飭司道設法挪湊應急東省庫儲情形雖非昔比每年僅籌二萬兩尙不爲難而黃隄要防庶免費絀貽誤事關東省民命財賦如此各半籌濟亦得事理之平除未盡事宜飭道隨時妥籌稟辦外所有東明黃河南隄現擬酌設營汛並派練軍常年駐工修防請由山東協撥經費緣由理合附片陳明伏乞

奏 聖鑒訓示施行謹

大清滹沱各工完竣摺

光緒七年六月初九日

奏爲挑挖大清河下游並月闢滹沱減河修濬北運減河各工均已剋期完竣恭摺仰祈

聖鑒事竊臣前因大清河自文安縣左各莊至臺頭係入淀尾閘高仰狹窄每屆汛漲停積不下上游因之壅潰近河州縣頻受其害必須挑挖寬深使河水暢洩東淀達津入海又滹沱河自北徒後故道難於挽復其現行古羊河下游本無出路沿河州縣受害甚深文安窪久成澤國疊經設法籌度須於獻縣朱家口古羊河東岸月闢減河使其分歸子牙河達津入海當於去冬派員分往詳細察勘議定工程做法大清河下游委助辦直賑之浙江紳士候選道金福曾督辦滹沱減河委候補道史克寬督辦所需工費商懇東南各省官紳集捐濟助不敷之數飭司道竭力挪湊仍集

奏稿四十一

其

附近災民以工代賑業於今年正月

奏報在案又寶坻縣境內有王家務減河上自香河入境下達甯河七里海武清縣境內有筐兒港減河下入天津塌河淀該兩河皆分減北運河盛漲寶坻一河年久失修節節阻塞亦坍塌兩岸數百村連年被水武清一河早爲居民佔種前於同治十三年月開新河復被民間盜決隄防填淤河道皆應擇要修濬當派候補道周金章候補通判袁遂分往勘議興辦寶坻約需漕米二萬三千餘石銀二千兩武清約需漕米二千九百石銀二百兩一併以工代賑均自二月中旬起次第開工五月初旬陸續報竣計大清河下游從左各莊至臺頭二十八里零挖口寬十二丈至十四丈底寬五丈五尺至八丈七尺挖深一丈三四尺河形漸去漸低挖深亦漸減至臺頭淀邊挖深八九尺其挖出之土送至十

丈以外分別培隄攔水又因左各莊以上任莊河流偏束酌展河身二百丈又因北面中亭河淤淺就便挑挖七百八十餘丈並裁去淤灘一百九十餘丈堵築決口七處此大清河下游工程里數丈尺辦法也滹沱滅河自獻縣之朱家口起至子牙河長三十三里零挖口寬十一丈至十五丈底寬五丈至十二丈高處挖深一丈九尺最窪處挖深七尺於兩旁五六七丈以外出土堆築南北新隄底寬五六丈頂寬二丈二三尺高一丈三四尺又於南隄修砌涵洞五道以洩隄裏瀝水其當窪心之處空留三百餘丈另挑引河以收南窪漫流歸河李謝留鉢野廠三村共建木橋三道並將舊有臧家橋修建完整以便行旅其附近子牙河古羊河隄決口一併堵築此滹沱滅河工程里數丈尺辦法也寶坻北運滅河自大白莊起至張口嘴長三十一里零挖口寬十三四丈底寬五

六七丈因地勢低窪下游七里海高仰恐致倒漾只能挖深二三尺至五六尺兩面出土各於二十丈外築成長隄底寬五丈頂寬一丈六尺高七尺中段舊有遙隄不能束水亦移近改築又滅河之東有袖針河隄工自黃莊至楊岡莊兩岸各長三十三里零亦已廢壞遂於河中取土加培底寬三丈頂寬一丈一二尺高四尺至六尺裁去河邊蘆灘十餘里並修楊岡以外窩頭河東埝五百餘丈武清北運滅河自王老莊至楊家河長十七里零挖口寬三丈至七丈底寬三丈至五丈因經費支絀先加深一尺至四尺卽以挖出之土加培南隄另修沈莊等處南隄一千一百餘丈大小莊等處北隄一千六百餘丈於吳辛莊大康莊各建木橋一座此寶坻武清北運滅河工程里數丈尺辦法也臣於工竣後親往大清河下游並委清河道葉伯英候補道萬國順候補知府吳中彥

分往滹沱減河北運減河逐一驗收丈尺均過原估毫無草率偷減用費亦均核實應俟截數仍歸賑案彙開清單奏報北運減河有此槽道隄工汛漲水至可資約攔分洩尙有應行加深及上下游疏濬工程來年續籌辦理大清河下游自開壩後溜勢甚爲迅疾上游河水驟落尺餘新開河道刷深自左各莊至臺頭皆水深一丈以外有遺流直下之勢現又將新河兩灘及臺頭淀邊蘆葦分別刈除以免阻礙河流其入淀淤淺之處人力難施再飭西洋機器船逐漸接挖至滹沱新減河地形極順深得吸川之勢自開壩後大溜滔滔東去衝刷河灘不少已將原走古羊河之滹水全行奪入新減河其漫流南窪之滹水亦由引河洩入新減河併注子牙刻下古羊上游河底吸深尺餘滹水驟落五尺古羊下游滹水竟已斷流據文安縣稟報該縣窪水日落現在深者四尺餘淺

奏稿四十一

六

者僅七八寸可種稻者一百二十餘村已成旱地者七十餘村不能種者一百十餘村等語若新減河再衝刷寬深伏秋盛漲必能奪古羊全溜則獻縣以下八州縣從此積患可除文安窪有涸復之日獻縣以上州縣亦獲暢消之利殊於大局有裨除分飭籌議修守章程核定飭遵外至此大工程多於水中開挖且有老蘆叢密不堪駐足之處在事人員胼胝經營力任艱苦剋期告成其南省官紳不分畛域代集巨款遠來挑辦尤屬異常奮勉殊堪嘉尙容臣遵照前奉

俞旨擇尤酌請獎敘以昭激勸所有挑挖大清河下游並另開滹

沱減河修濬北運減河剋期工竣緣由理合恭摺具陳伏乞

皇太后

皇上聖鑒謹

奏

奏稿四十一

十九

瀕龍河並千里隄工片

光緒七年六月初九日

再保定府屬之瀕龍河上承唐沙滋三水會於邢州三岔口經安平博野蠡縣高陽而入西淀此河亞於五大河而水性湍悍奔騰盪決往往衝齧民田臣於莅直後已飭修復南北兩隄逐年加修督民防搶前查蠡縣社甲公隄高陽駱駝灣一帶河身淤曲南隄卑薄盛漲每易衝塌因飭清河道葉伯英察勘估辦惟展寬河身需費甚巨無從籌措只可擇要培隄以資抵禦酌挑淤灘以紓溜勢遂於今年三月初十日開工上自社甲公隄起經駱駝灣下至黃新莊止隄長七千四十丈加培底寬七丈至七丈四尺頂寬一丈四尺至二丈築成內外兩坡高九尺至一丈二尺其間團丁村險工一百十丈格外加培底寬九丈並於社甲公隄加築套隄九十丈駱駝灣中灣加築套隄八十丈均底寬五丈頂寬一丈高九

奏稿四十一

千

尺其緒口村團丁村連城村隄根舊有水坑串溝均卽填實王氏墳歸還村串溝密築土格二十五道布里橋以上北岸淤灘一段遮蔽橋孔阻遏河流挑去上坎長六十丈下坎長八十三丈寬五丈至十五丈深一丈暨將橋座加寬升高共需工費銀二萬餘兩又前修任邱千里隄所以分格河淀保衛田廬極關緊要上年大汛開被衝刷今自白石碑起至里長灣止開段湊長四千五百八十餘丈照舊式培成底寬五丈頂寬一丈高九尺並於險要處添做埽工一千二百十餘丈計需工費銀八千餘兩均令該道葉伯英駐工認真督辦隄皆層土層礮築厚一尺打成七寸錐不易入統於五月十八日工竣飭候補道史克寬前往量驗各工丈尺有盈無絀做法亦甚堅穩所需工費係於賑款內撥給招集附近窮黎以工代賑除截數開單彙報並飭實力防汛外所有修培蠡高

瀕龍河南隄酌挑北岸淤灘並修任邱千里隄工竣緣由理合附
片具陳伏乞

聖鑒謹

奏

奏稿四十一

三

李鳳苞仍賞花翎片

光緒七年六月初九日

再出使德國大臣兼肄業監督李鳳苞前因督率福建船政生徒出洋肄習期滿學成經臣照案奏獎請

賞戴花翎欽奉

批旨允准旋經吏部議駁以出使外洋不准保獎翎枝應片核請獎等因查吏部奏定章程內開軍營打仗出力始准保獎翎枝又出使外洋隨帶各員請獎照異常勞績辦理仍不得保獎花翎各等語似專指出洋隨員三年後回華給獎者言之李鳳苞監督生徒派往英法兩國鐵甲船及官民各廠學習駕駛製造之法周歷督查實心實力俾諸生學業日進凡兵船操防布陣迎禦之機以及電氣水雷鎗礮礦學藝學靡不研求理法確有心得於以開風氣而振武備論其勞績非僅一時打仗出力者可比而較之尋常

奏稿四十一

三

駐洋各員責任更自不同值此講求船學力圖自強之日非稍示優異不足以鼓勵人才況李鳳苞現充德奧義荷蘭四國使臣前請

賞花翎業蒙

恩允若復行撤銷觀瞻所繫體統攸關擬請仍照原獎仰懇特恩賞戴花翎以昭激勸理合附片具陳伏乞

聖鑒訓示謹

奏

請獎王得勝片

光緒七年六月初九日

再光緒二年三月間教練礮隊德國都司李邁協期滿回國經臣於海防營內遴選年力精壯之遊擊卞長勝等七員商令帶赴德國學習武藝俟學成回華分撥各營教練議定三年爲期復經派令監督船政學生出洋肄業之道員李鳳苞就近查察功課旋因卞長勝朱耀彩學業未能精進先調回華楊德明一弁攻苦成疾回華身故其袁雨春查連標劉芳圃三弁學成期滿回華分撥親軍哨隊教練尙有王得勝一弁仍留柏林都城延師專教業於光緒五年十月內

奏明在案伏查藍翎守備王得勝自光緒二年赴德後派入斯邦道第四營學習格林操迎敵各法續調博洪礮廠觀摩製造三年春調赴維廉士哈芬海口學習礮法四年四月調往溪耳海口礮臺

奏稿四十一

三

學習礮壘水雷行軍測繪地圖五年五月復調至柏林專延教習詳加考驗將學過之藝逐一講解並延師續教以資深造至光緒六年十二月凡德國行軍測繪迎戰陣法礮臺營壘水雷各藝均已學成由李鳳苞咨送回華本年二月到津後經臣面加考驗該弁所習技藝均甚精熟入營督操較袁雨春等三弁爲優其礮臺水雷測繪諸藝爲出洋諸生之冠現飭委管帶親兵營仿照德國軍營陣法嚴勤操練認真傳習查上次袁雨春等三弁學藝回華曾經保獎官階加給翎頂奉

旨允准有案王得勝一弁出洋年久學業較深艱苦備嘗尤堪嘉獎合無仰懇

天恩俯准將藍翎儘先守備王得勝留於直隸以都司儘先補用

并

賞換花翎以示優異理合附片具陳伏乞
聖鑒訓示謹
奏

奏稿四十一

三十四



兵差報銷酌議章程摺

光緒七年六月初九日

奏爲查辦各屬兵差報銷酌議章程分別奏咨立案恭摺仰祈
聖鑒事竊直隸各州縣歷年供應各處征調遣撤過境官兵應需
廩給口糧馬乾車價房價並運送軍裝器械火藥糧餉等項業經
截至光緒四年十二月底止分年分起造冊奏銷在案其四年以
後應辦銷案擬請兩年彙報一次今查自光緒五年正月起截至
六年十二月底止已由升任藩司任道鏞檢查各屬送到銷冊詳
細句稽分別准駁核實造報其中有應循舊章者有應酌量變通
者詳請奏咨立案前來臣覆核無異除咨戶兵工三部外所有應
行奏明立案事宜理合繕單恭摺具陳伏乞

皇太后

皇上聖鑒謹

奏稿四十一

五

奏

謹將查辦各屬兵差報銷酌議應行奏明立案事宜繕單恭

御覽

呈
計開

一帶兵官弁廩給跟役馬匹等項應按品級照例核計但各屬冊報往往參差歧異若必逐一查查不特輾轉往還有稽時日且各營或已遣撤或已改調更難查考擬請量爲變通除原營已有帶兵官弁銜名送到者仍核實辦理外其未送到者卽按各屬冊報以上下站比對其銜名參差者以最小之品級爲準其多寡不符者以最小之數目爲準毋庸咨取各原營銜名以歸簡易

一兵部奏定章程遣撤東三省察哈爾熱河密雲等處官兵如未經奏明咨回原處者車輛廩給概不支給惟近年遣撤官兵到境

奏稿四十一

三

總以糊口無資紛紛索取並有傷病之人情甚可憫勢難概不應付且遣撤東三省官兵多有赴兵部請給護牌者州縣尤不能不照牌應付應請凡遣撤東三省等處官兵如有兵部護牌飭令應付者無論遣撤時曾否奏明俱准報銷以歸劃一

遵議鴉片釐稅事宜摺

光緒七年六月十六日

奏爲遵議洋藥土煙加增內地釐稅事宜恭摺仰祈

聖鑒事竊臣欽奉光緒七年五月初九日

寄諭左宗棠奏禁食鴉片請先增洋藥土煙稅捐一摺著南北洋大臣福州將軍各省督撫粵海關監督各就關口地方情形詳細體察將稽查徵收章程悉心妥議覆奏候旨定奪此事務在必行該大臣等當熟籌辦法期於大局有裨等因欽此當卽分行北洋各關道一體欽遵籌議在案竊維洋藥流毒甚深旣難驟然禁止只可先加釐稅藉以稍濟餉需而煙價較增吸者或漸減其癮未始非徐禁示罰之意臣於同治十三年海防事宜案內業經議及惟釐稅加增太重恐致偷漏愈多亦須統盤籌計查洋藥係由印度先到香港然後分運進中國各口香港爲英國屬地中外奸商

奏稿四十一

三

卽於該處私相授受檢閱總稅務司開呈各關華洋貿易總冊同治十二年至光緒四年所到香港洋藥每年八萬四千餘箱至九萬六千餘箱運銷各口有稅者則止六萬五千餘箱至七萬一千餘箱光緒五年所到香港洋藥十萬七千餘箱運銷各口有稅者則止八萬二千餘箱實計每年香港私銷洋藥二萬數千箱除分運新嘉坡舊金山各埠外餘皆不經新關不收稅釐而由沿海各項民船漁艇零星潛運內地且多不入有關卡之正口各省濱海之區袤延萬餘里河港紛錯沙岸無垠勢難處處設卡節節防查其偷入內地之後路徑四通八達或假冒鑲車官差或附搭眷船行李狡謀詭計百出不窮卽使經過關卡亦不能逐人逐件一一搜檢致生事端至賣放包庇之弊在所難免巡丁豈知大義洋藥價值甚昂走私者卽偶被查出但分給時值十中之一二巡丁得

此已足償數月之辛金未有不縱放者更有豪強之徒糾合亡命執持兵器包攬闖越結幫與販關卡巡役單弱往往熟視而無如何自來私鹽最干例禁巡緝亦較嚴密然販私者無省不有或竟聚夥數十人公然馱載到處灑賣拒捕兵役雖峻法嚴刑無以敢其心志蓋利之所在身命有所不惜也洋藥拆箱之後包件輕小取攜甚便隨身可以夾帶非私鹽笨重可比其獲利更厚於私鹽什倍百密一疏則騙釐者得計而報捐者向隅此杜絕偷漏不易之實在情形也凡事清其源則用力少而程功易截其流則需費多而收效寡洋藥偷漏之源實在香港惟難於該處稽徵不得不就各省自立章程以爲截流之助臣督飭津海關道鄭藻如查得津關進口洋藥從前每年可銷七千箱近因釐數稍加止有四千箱左右或三千數百箱緣山東河南與直隸毘連地面向皆由

奏稿四十一

三

津運往今則漸從鎮江煙臺分運天津銷數遂減至洋商運洋藥進口應先赴新關納稅將貨起存洋行鈔關不再徵稅凡華商買取者向赴洋藥釐捐局請領聯票逐箱秤驗照章每百斤完正加釐捐銀二十四兩地方善捐耗羨等銀八兩零其由津運赴內地聞崇文門按洋藥每包收稅銀一兩零此外如通州居庸關張家口固關大名府亦各有稅釐數目畸零並無大宗茲擬稅釐兩項每箱共加至一百五十兩除進口稅三十兩仍由洋商完交外其內地稅釐應合一百二十兩較前增數甚巨自應設法嚴防偷漏據鄭藻如詳稱擬由海關另設關棧洋藥進口立即起儲棧內勿再分存洋行以免散而無紀遇有華商購買先赴總口釐局交足捐項方准出棧惟關棧之設固能防弊尤貴便商應令總稅務司妥籌辦法應否知照各國公使俾免掣肘由總理衙門察酌辦理

至棧租一切與洋商無涉惟火險須洋商自保所有口岸轉販洋藥之華商字號擬令先領部帖方准開設部帖由關道核給每張令繳費銀五百兩十年一換既須領帖又重其費庶開設較少稽查較易並令五家聯保一家偷漏四家同罰其餘行戶及舊日號商現未領帖者一概不准私販洋藥土煙犯者全貨充公該商出資領帖利歸獨擅遇有私販自必尋蹤稟拏亦足助局卡之耳目其由沿海各口零星偷進者擬酌設小輪船二隻專在海面巡緝並飭近海州縣營汛出示曉諭協同稽查儻有私帶洋藥進口被人指報者拏獲後全貨充公以其半賞給指報之人不必再科私運之罪以免挾嫌栽害惟海面攬裝之船隻內地私囤之鋪戶一經查獲必予重懲州縣營汛如能緝獲私販洋藥積至一百斤以上者記功一次積功五次奏請議敘十次准保升階升銜以資鼓勵

奏稿四十一

完

勵至三聯印票係爲互相比對而設稅務司專管口岸之稅不管內地之釐既於總口設釐捐總局應卽由總局刊發三聯票以一聯留局存根一聯彙送總理衙門一聯給華商爲已完內地稅釐驗據貨到所銷之地將票呈官查收仍申送總局備核此擬洋藥進口稽查防弊之辦法也洋藥惟海關有一定稅則其餘內地稅釐各省輕重不一若照左宗棠所擬加增捐數必須各省議定統歸一律並俟奉

旨後定准日期南北同時開辦勿使有多寡遲早之分庶免一口獨重奸商趨避而餉源立竭至天津所收洋藥釐金向供海防練軍兵輪船薪糧及地方善舉之用本已入不敷出其崇文門通州各處亦藉稅釐以濟公需今統在總口捐交任其分販內地概不重捐則凡向有釐稅之處進款全無必至辦公竭蹶擬此後洋藥

進口除海關每百斤收稅銀三十兩外應按總口釐局所收之數分作十成以六成劃補天津從前收款解交津海關庫仍爲軍餉船糧善舉等用其由津分販內地者如係運經本省向有稅釐地方應按該處向來洋藥百斤徵銀若干照數劃出由局按月移解濟用別省稅關釐局不得援請劃解除分別劃交各處及巡緝火輪關棧局用經費外其餘存候指撥或解部充餉此洋藥加徵釐捐須各省統歸一律及就津口收數分劃應用之辦法也天津土煙無多稅釐收數甚少每年不過一二百兩或三四百兩其運銷各州縣者皆不入津境各路土煙價亦不一茲就天津售價計之最貴者山西所產每百斤值銀三四百餘兩其次山東河南奉天所產每百斤值銀三百兩上下又次四川所產每百斤值銀一百餘兩若就價值之高下遞分稅釐之等差實開滋弊之端今擬不

奏稿四十一

三

分何處出產統照洋藥內地稅釐之數減成徵收土煙無進口之稅暫按一百二十兩三分減二定爲每百斤共徵稅釐銀四十兩此口徵則彼口免彼處徵則此處免完過稅釐之後領有執照無論運往本省何處均不重徵蓋土煙路路可通人人可帶更屬防不勝防捐數稍減或偷漏較少且土煙之毒究比洋藥爲輕而民財亦不外耗儻將來洋商無利可圖洋藥漸不來華再增土煙稅釐益加厲禁尙未爲晚所有稽查防禁事宜應酌照洋藥辦理惟直隸地方平坦遼闊頭頭是道斷難備設局卡徒糜不貲之費轉添無事之擾只有擇要責成地方官如督豫東奉入直要道卽責成該管道府督同州縣就近認真經理如能緝獲私販一體記功給獎此土煙擬加稅釐稽查防禁之辦法也總之加捐易辦偷漏難防洋藥來自外洋洋人利在多銷必多方以撓我查禁之法土

煙產自各省官役力難徧及必多方以求其繞越之途臣熟籌辦法但盡其力所能爲未敢謂確有把握至臣所轄山海東海兩關現尙未據覆到該兩省情形雖未盡同大致無甚區別如將來南洋各口一律照加該兩口自可酌照直省章程會商核辦其藥釐內向有解津之款仍應核數劃解除將津海關道擬設關棧稽查大概章程咨送總理衙門查核外所有遵議緣由理合恭摺由驛覆陳伏乞

皇太后

皇上聖鑒訓示謹

奏

再近有粵商何獻墀等擬於香港設立洋藥公司據瓊州鎮總兵彭玉翰林院編修鍾德祥先後代呈節略大致謂該商等擬集銀二千萬圓以作公司資本先與印度妥訂章程合同每年限定運赴香港洋藥若干箱每箱價值若干統歸公司承買繳價再由該公司發售中國各口不准印度洋藥徑運他處售與他人如於定數外尙可多銷再由公司寄信印度添運該公司於賣出後每箱統交中國稅釐銀一百餘兩四月開適有英官沙苗奉派前來中國查考各口每年售銷洋藥數目何獻墀等與之相見議論創設公司之事沙苗允爲留意謂若中國與印度肯照承辦再行函知各等語該商等遂屬彭玉轉言於臣鍾德祥假旋游粵素悉洋情深明大局亦將此意函達前來臣維印度洋藥之來中國必須先

奏稿四十一

三

到香港而私銷卽在該處爲多按總稅務司開呈總冊每年私銷者約有三萬數千箱以現議每箱稅釐百五十兩計之是每年偷漏銀已三百數十萬兩將來南北各口驟加捐數難保各省奸商不徑赴香港私運至沿海無關卡之處灑賣私銷則成本愈輕獲利愈厚所謂爲淵馭魚爲叢毆爵患生於所備之外卽法令有時而窮誠能於香港設立公司專歸公正殷富華商經辦仍聽官主持一切務使全綱在握毫無偷漏不但歲餉頓增數百萬而各省口岸內地之局卡及各路之巡船均可裁撤節省糜費尤屬不少聞何獻墀等多係殷富久在粵省香港一帶貿易熟悉華洋商情其他富民聞有此舉亦願出資附股蓋買賣洋藥統歸公司咸知有利無害是以集本不難其應交釐稅則明立保結嚴定章程特派大員前往監收按照各省關稅釐收數分別批解其有盈餘

提撥部庫亦尙無慮虧缺惟香港爲英國屬地有該國總督駐紮
必須該商等先與該總督及印度總督熟商俾英廷君臣均無扞
格如能允其照辦給予憑約勿任洋商爭奪阻撓偷運私售此議
乃可有成事既關乎大局權非自我獨操英員沙苗前曾過津謁
晤旋卽回國未知該國及印度部主見究竟若何臣於彭玉展
覲回粵時已屬其傳諭該商等自行與英官設法疏通俟有定議
切實稟知再咨商總理衙門暨兩廣督臣核酌妥辦茲因議加各
省洋藥稅釐誠恐偷漏愈多終致有名無實不得不就彭玉鍾德
祥之論聊備一說其成否尙未敢預定除先咨總理衙門主持商
辦外合再附片瀝陳伏乞

聖鑒訓示謹
奏

創設公司赴英貿易摺

光緒七年六月二十日

奏為招集華商創設公司專赴西洋貿易以立富強之基恭摺仰

祈
聖鑒事竊查光緒六年十月祭酒王先謙奏請令商船出洋片內
聲明船政大臣黎兆棠前議創立宏遠公司運貨出洋請咨商舉
行湊集商股作速開辦欽奉

寄諭目下情形能否及此將來如何漸次開拓興辦著妥籌具奏
等因旋經臣等先後覆陳擬暫就招商局現有輪船酌量試辦逐
漸推廣並緘屬黎兆棠請其勸諭粵商設法倡導茲准黎兆棠咨
據廣東職員梁雲漢劉紹宗梁紹剛等稟稱泰西以商立國商務
之盛衰卽國勢強弱所由判凡有益商務者必竭全力以圖之年
來日本步趨泰西亦四出通商以為利國利民之本中國地大物

奏稿四十一

三

博商務為四洲之冠洋人視為利藪紛至沓來有可以從中圖利
者鮮不多方挾實由彼來而我不往也卽有到金山古巴祕魯
等處者亦僅貧民傭工並無殷商前往似未足以立富強盛業現
已招集殷商湊成鉅款名曰肇興公司擬往英國倫敦貿易以為
中國開拓商務之倡該員梁雲漢在粵東總理劉紹宗梁紹剛往
倫敦管事不領公帑不准洋商附股一切進出口貨完稅章程請
照洋商一律辦理以昭平允惟事屬創始必須官為維持請由通
商大臣給諭前往並轉咨中國駐英大臣隨時主張俾得與各國
在英商人一體優待等情請奏前來竊維西洋富強之策商務與
船政互相表裏以兵船之力衛商船必先以商船之稅養兵船則
整頓通商尤為急務邇者各國商船爭赴中國計每歲進出口貨
價約銀二萬萬兩以外洋商所逐什一之利已不下數千萬兩以

十年計之則數萬萬兩此皆中國之利有往而無來者也故當商
務未興之前各國原可閉關自治建風氣大開既不能拒之使不
來惟有自擴利源勸令華商出洋貿易庶土貨可暢銷洋商可少
至而中國利權亦可逐漸收回前此招商局輪船嘗駛往新嘉坡
小呂宋越南等埠攬載近年和眾美富等船分駛夏威仁國之檀
香山美國之舊金山載運客貨究止小試其端尙未厚集其力英
國倫敦爲地球內通商第一都會並無華商前往黎兆棠志在匡
時久有創立公司之議盡心提唱力爲其難現既粗定規模自當
因勢利導期於必成惟草創之初能否獲利尙無把握祇有官商
上下合力維持以期漸推漸廣所有該公司出進口貨物在中國
通商各口者應准照洋商一律辦理其出洋後沿途及抵倫敦一
切貿易章程應得與各國在彼商貨一律辦理臣等擬卽咨商駐

奏稿四十一

三五

英大臣曾紀澤隨時設法主持保護俾該商等遇事有所稟承並
給諭與該公司仿照泰西通例五年之內只准各處華商附股不
准另行開設字號免致互相傾跌貽誤大局除俟開辦後各口分
支設棧及未盡事宜隨時酌核咨行查照外所有招集華商創設
公司前往英國倫敦貿易緣由謹會同南洋通商大臣劉坤一船
政大臣黎兆棠合詞恭摺具陳伏乞

皇太后

皇上聖鑒訓示謹

奏

王德均暫緩赴吉片

光緒七年六月二十日

再臣承准軍機大臣字寄六月初一日奉

上諭吉林地方緊要現在整頓邊防所有製造軍火修築礮臺均屬目前要務吳大澂擬於省城開設機廠製造洋藥彈子等件卽著照所請行呂片奏請暫調天津機器局道員王德均來吉差委著李鴻章卽飭該員前赴吉林等因欽此遵卽轉飭候選道王德均知照旋據王德均稟稱凡事創始維艱製造門類紛繁尤難罄述惟有緊要數端不能不爲代籌者一須因地制宜吉林水道不能直達陸路運重糜費稽時一機器重過數千斤者卽難運行吉省購器應擇輕小之件爲宜一須預籌經費滬津各局皆有指定鉅款積久經營規模始見宏敞吉省無此物力器料驟難全備只可酌量購用如足踏手搖及汽爐之類僅備隨時修理軍械他如

奏稿四十一

三六

儲料造藥建廠用匠各事宜已會同津海關道鄭藻如及機器局

員酌擬辦法開摺寄達吳大澂察核並稱由津局就近照料較易

設法卽親自前往亦不過如此辦理等語臣查王德均老成練達

研精機器經臣委辦行營製造局十有餘年用費較他處節省而

造成各件亦蔚然可觀蓋以該局與機器局互相附麗諸務均可

通融而王德均又能精心擘畫也誠如吳大澂所稱爲臣處得力

之員未能久離津局因思吉林經費旣形支絀運路又極艱難經

始之初尙難倉猝就緒王德均所擬各條切中事理吳大澂循照

籌辦當可漸入門徑況吉林運器購料必由天津王德均在津代

籌儘可隨時照料俟各種緊要機具物料稍備再令王德均等選

派熟習委員工匠前往不致誤事除咨明吳大澂查照外理合附

片覆陳伏祈

奏
聖
鑒
謹

奏稿四十一

七

職官句串洋人強詐摺

光緒七年六月二十日

奏為審明職官句串洋人駕空強詐華商巨款按律定擬恭摺仰

祈
聖鑒事竊查前據津海關道鄭藻如稟報職官吳樾等句串洋人
米若士等駕空強詐京都裕豐金珠店銀六萬兩一案經臣將吳
樾等

奏參革職卽交津海關道鄭藻如天津道吳毓蘭督同天津府知
府宜霖認真提究茲據審明擬議具詳前來臣親提吳樾何連及
原告段盛藻逐一核訊緣吳樾卽吳蔭庭籍隸浙江鄞縣報捐知
府銜同知保舉花翎分發直隸試用何連卽何鼎壽又名夏珍籍
隸浙江上虞縣報捐花翎候選同知保加四品銜何連前領浙江
候補道朱其昂成本於京津上海廣東開設華裕豐匯銀票號與

奏稿四十一

完

原任江蘇糧道英樸在京所開之裕豐金珠店曾有銀錢往來嗣
因朱其昂病故本銀提盡裕豐金珠店卽不與交易其原存華裕
豐票號銀二萬六千兩經裕豐掌櫃人段盛藻設法取回何連因
段盛藻取回存款致華裕豐益難周轉陸續歇業遂深恨段盛藻
意圖陷害在京涉訟未結此光緒六年七月以前事也適有廣東
華裕豐未銷廢票五紙計銀六萬兩何連起意借此訛詐並欲借
洋人之勢控追遂與吳樾商量吳樾卽為其設謀句串在津開設
裕順和洋行之俄人米若士將此廢票捏作華裕豐欠裕順和洋
行實在銀款又以裕豐金珠店與華裕豐票號前有往來指為同
一東家謂華裕豐倒閉應由裕豐給還又檢出英樸前因兩號通
融銀兩致蘇州人張芝芳之信一併交給米若士令米若士冒認
張芝芳以為向英樸家索討憑據希冀英樸家屬與段盛藻見有

洋人畏懼付銀彼此分贓米若士旋遣英人恆德生於上年十二月持票進京討要領有俄領事官章貝印據段盛藻未與見面其鋪夥言此係廣東華裕豐之票與裕豐金珠店無涉恆德生本未知串詐細情遂帶票回津本年正月段盛藻有事來津借住候補同知鄭煥寓內何漣等告知米若士復遣恆德生往索段盛藻仍未見面旋即回京行至津郡北門外即被米若士帶同跟人邵姓冒充俄國領事公差將其攔回段盛藻情急赴津海關道衙門呈控該關道鄭藻如函詢俄領事官章貝據覆廣東華裕豐應付天津裕順和洋行銀六萬兩有票為據須由京號裕豐金珠店掌櫃段盛藻付給請飭段盛藻與洋商會面妥商該關道訪係華官串詐隨提到何漣吳樾並搜獲吳樾親筆信據究出實情稟經臣將吳樾何漣

奏參革審復在吳樾寓所起獲何漣親筆信件及米若士洋文信件內有事後米若士應得銀一萬兩之憑據並據吳樾供明米若士知係廢票等語經臣添委通曉洋文洋語之候選道馬建忠提同洋商與領事官會訊乃俄領事章貝初則託詞延宕繼因吳樾不肯指證米若士知為廢票章貝即不再訊其為該領事袒護洋商已可概見事關外交涉應將米若士等受屬詐銀希圖分贓一節另由關道與領事爭辦核辦其吳樾何漣二犯供證已甚確鑿應即擬結查例載兇惡棍徒屢次生事行兇無故擾害良人人所共知確有實據者發極邊足四千里安置凡係一時一事實有情兇勢惡者亦照例擬發等語此案何漣因挾裕豐金珠店不與通融之嫌輒敢以廢票圖詐數至六萬兩之多吳樾竟為設謀勾串洋人冒認欠項恐嚇強詐查吳樾親筆致何漣信內謂已託洋

人安頓妥當由伊先給洋人盤費進京追討隨後用洋官公文向
總理衙門控追屬何漣務須照伊前信說法萬勿改口伊當竭力
周全斷不使何漣喫虧並謂洋人事件到總理衙門雖值元旦亦
是要辦令何漣放心何漣親筆致吳懋信內令吳懋託洋人找一
簡假芝芳造一箇洋行招牌要米若士有香港認識洋行以備總
理衙門行查並謂廣東帳簿已經做好不怕總理衙門查帳又言
英樸家及段盛藻非做到十分嚴緊不肯付銀務限總理衙門五
日多則十日速向英樸家及段盛藻要銀等語雖賊未入手而歷
次商謀各節實屬駕空擾害兇惡狂妄膽大已極此風斷不可長
該兩犯皆情無可貸厥罪惟均應將革員吳懋何漣俱依棍徒擾
害例擬發極邊足四千里安置吳懋係到省候補職官應發黑龍
江充當苦差何漣以商人捐職候選尙係常犯應定地解配杖一

奏稿四十一

四

百折責安置照例刺字冒充公差之華民邵姓飭緝獲日另結其
餘牽涉人證或因向何漣討要帳目被何漣愚弄或本屬無干即
何漣信內所稱段盛藻騙銀一節亦無其事應免提質以省株連
廢票五紙業經追出句銷存卷除錄具各供并鈔信件分咨總理
衙門刑部查照外所有審明定擬緣由理合恭摺具

奏伏乞

皇太后

皇上聖鑒訓示謹

奏

修竣津城濠牆摺

光緒七年七月十五日

奏為津郡城外牆濠關係一方保障現經官商捐修完竣恭摺仰祈

聖鑒事竊天津郡城規模狹小城內民居無多且井少水鹹難供汲飲是以富家大賈多在城外其東北關廂一帶尤為精華萃聚必須嚴設關防用資保障咸豐九十年間前親王僧格林沁已令官商捐修外城濠牆同治七年捻逆竄至兵民協守甚資其力迨十年十一年疊被大水衝塌已成平地臣於去秋商飭長蘆運司如山津海關道鄭藻如天津道吳毓蘭會同詳細勘議集捐興辦應仿舊址酌加展寬從新修築素土圍牆一道計長六千七百餘丈高一丈一尺頂寬一丈二尺底寬三丈六尺至四丈五尺牆頂靠外加築垛牆一道高四尺頂寬二尺底寬四尺牆腳一二丈外

奏稿四十一

四

挑濠一道計長六千九百餘丈面寬三丈至八丈底寬一丈至五丈深五尺至九尺即以挑出之土築牆有不敷者於他處取土加築又土牆周圍建營門十四座兵房二十一間以便看守啟閉牆上修土礮臺二十八座以扼形勢牆裏開馬道三十四條以便登陟牆外建木橋五座以通行人牆根置水關六座涵洞六座石閘一座以宣洩水勢即將通工分作三大段北運河西岸至南運河迤南為一大段南運河迤南至海河西岸為一大段海河東岸至北運河東岸為一大段由如山鄭藻如吳毓蘭各督府縣委員雇募民夫分段承辦去冬未凍以前先將濠牆土工趕築就緒今春開凍以後接辦垛牆礮臺營門兵房馬道橋閘於六月初十日一律竣事臣即親往督同道員朱福榮萬國順周厯逐細驗收牆臺均係層土層礮築厚一尺打實七寸濠身深廣水關用外洋鐵鈔

木作成樑柱堅結異常其餘各工亦均穩固經久所需工費樽節
動支計共用銀七萬九千四百餘兩如山鄭藻如各捐銀一萬兩
吳毓蘭捐銀一千兩天津府知府宜霖捐銀六百兩天津縣知縣
郭奇中捐銀四百兩長蘆鹽商公捐銀二萬兩其不敷銀三萬七
千四百五兩九錢六分二釐已於加增洋藥釐捐項下撥補竊維
津郡爲海疆重地城外商戶民居日益繁盛勢難聽其四通八達
毫無屏蔽臣屢擬修復圩牆苦於經費無出今幸官商合力通籌
已將牆濠三十餘里剋期告竣更於扼要之處增築礮臺以相策
應設有緩急洵足禦外侮而固人心又相度地勢高下建置水關
閘座涵洞不特宣洩潦水而環濠民田亦可就近引灌洵於地方
形勢民閒生計有裨現已飭派弁兵常年看守遇有坍塌淤墊仍
由該司道各按原辦段落自行籌款認修若值交卸應驗明各工

奏稿四十一

呈

是否完善令接任司道出具收管照章修辦務使歷久不廢永資
捍衛除蘆商捐款係通綱商人分作五年按引零星攤繳無庸議
獎辦工出力委員由臣酌給外獎惟該司道等倡捐銀兩力成
要工實屬保衛地方盡心民事如山鄭藻如各捐至一萬兩之多
尤堪嘉尙擬請

旨敕部將該司道府縣分別從優議敘以昭激勸此項工費大半
係屬捐款且辦理甚爲核實並請免其造冊報銷俾省繁費所有
津郡城外牆濠現經官商捐修完竣緣由理合恭摺具

奏伏乞

皇太后

皇上聖鑒訓示謹

奏

飛虎船救護壞船請獎片

光緒七年七月十五日

再上年四月間派蚊船兵船出洋操巡由大連灣駛往海洋島鎮南船底誤觸暗礁情形危險總教習葛雷森親督各船弁兵並飛虎船水手設法救護拖帶進口業經臣奏奉

俞旨賞給葛雷森二等寶星並將鎮南船大副李和礮勇李貴等分別獎敘在案臣因飛虎輪船已回粵海關當即劄行總稅務司赫德查明該船出力員弁酌請獎勵茲據赫德呈稱當鎮南觸礁之時飛虎船管駕官哥嘉聞警立派葛雷森乘小艇先往自督飛虎船隨行既知鎮南船底穿挂於礁石之上不能轉動哥嘉與葛雷森商定將鎮南船中應行啟閉料理各事妥為布置一面督飭水手掏出艙水待潮信漸至哥嘉即回飛虎用繩拖帶鎮南駛行不遠繩忽中斷哥嘉只備繩索拴繫預飭大副章師敦在進口要

奏補四十一

聖

路懸燈照耀始得進口停泊厥後在海洋島暫為修理遂獲送赴煙臺則哥嘉屬葛雷森專主其事此外最出力者尚有管輪副堪士郎大副章師敦水手首領史類白皆視鎮南事為己事奮不顧身齊心救護可否酌請給獎等情前來臣查稅關巡船代北洋礮船出力赫德與該船員弁等皆視為分所當為並非望格外得獎惟值此整頓海防之際各洋將能爭先效命非酌予優獎不足以示鼓勵所有前管駕飛虎船遊擊銜哥嘉擬請

賞給頭等寶星並加參將銜管輪副堪士郎及大副章師敦擬請賞給二等寶星水手首領史類白擬請

賞給三等寶星並由該總稅務司普加飛虎船水手人等一月薪水銀兩稽查激勸理合附片陳請伏乞

聖鑒訓示謹

奏

奏稿四十一

四

籌濟吉林機器片

光緒七年七月十五日

再吉林邊防緊要所需洋藥及後膛子彈等件業經吳大澂奏准於省城開設機器廠製造並擬暫調天津製造局道員王德均赴吉臣以王德均研精機器爲臣處得力之員未能久離津局吉林運器購料必由天津

奏明飭王德均在津代籌隨時照料俟緊要機具物件稍備再派熟習委員工匠前往在案竊維吉林創設機廠理大物博經費甚形支絀應需機器勢難全在西洋訂購且恐緩不濟急查上年四月臣議覆吉林設廠創辦小輪船請調廣東道員温子紹製造案內欽奉

諭旨將粵海關監督俊啟代購神機營設廠之機器選擇合用者由海道運至奉天營口再由陸路運吉温子紹暨隨帶工匠機器

奏稿四十一

五

赴吉川資著該督撫監督籌給等因欽此旋因温子紹未能前往機器仍存廣東今吳大澂設廠製造軍火情事相同器具亦可通用應令將前項機器運解應急其餘應添各件容飭王德均察酌代購將來如經費較充廠務逐漸開拓再由臣隨時緘商吳大澂籌造輪船後啟現已任滿離粵應即由兩廣督臣張樹聲查明所存各種機器委員迅速儘數解津交王德均驗收分別轉解吉省其自粵至津運費仍請遵

旨由該省籌給除分咨張樹聲吳大澂查照辦理外理合附片具陳伏乞

聖鑒謹

奏

李朝儀政績摺

光緒七年七月十五日

奏爲已故順天府尹歷官政績懋著賢勞請

旨宣付史館以勵循良恭摺具陳仰祈

聖鑒事竊維求治以察吏爲先課吏以得民爲本

畿輔爲首善之區徭重政繁甲於天下非周知利病不能勤恤民
依非久歷艱難不能諳通治術查有已故順天府府尹李朝儀貴
州貴筑縣人由道光乙巳科進士簽分直隸知縣累膺遷擢先後
官

畿甸者三十七年潔己勤民始終一致臣請將其歷任政績爲

聖明縷晰陳之李朝儀初任平谷饒陽三河等縣升大興縣知縣
署南路廳升東路廳同知署順德廣平二府升大名府知府其在
饒陽巡緝四鄉盜風斂戢在三河建置書院文教蔚興在南路廳

奏稿四十一

異

創辦民團在東路廳督捕蝻孽凡親民應爲之事無不悉心體察
實見施行其在通州值咸豐庚申之役外侮憑陵土匪蠡起李朝
儀自天津防所星夜馳歸聯紳董除奸宄內修城守外訶敵情通
州賴以不擾有

賞加道銜之

命其在順德以民兵五百禦擒匪萬人於沙河境上相持一晝夜
援軍至而賊遁防堵撫輯保全實多有

賞戴花翎之

命並經前科爾沁親王僧格林沁督臣劉長佑奏報在案同治七
年十月前督臣曾國藩下車伊始振新吏治薦舉賢員以李朝儀
居首謂其明練耿介表率有方辦理地方事宜不懈弛亦不苛刻
士民稱之欽奉

諭旨該員才具政績均有可觀實爲直隸出色人員深堪嘉獎飭令益加策勵勉爲循良等因欽此旋蒙

特擢永定河道永定素稱難治遇澇輒潰李朝儀在任十年籌備料垛搶護險工請修金門閘及灰壩分洩汛漲每遇狂瀾驟至董役於深宵風雨之中員弁兵夫無不爭勸慎核官帑裁減陋規將道署公用詳定章程至今遵守臣與李朝儀共事最久見其積勞求退必以公義私情相助李朝儀力圖報稱亦遂不忍言歸光緒三年三月奏署直隸按察使五年補授山東鹽運使上年晉秩京尹方將隨事整釐盡心規畫用副

朝廷倚畀之隆不意年力未衰遽以憂勞病故身後蕭然賴京外同官賻助始得歸櫬黔中臣維自古循吏不必皆有赫赫之功惟其久任一方知民疾苦當時服其教令後世傳其設施李朝儀廉

奏稿四十一

聖

明正直爲僚屬士民所共知核其一生治行不離直順兩屬而公論所在久而益彰既邀

褒勉於

溫綸宜荷昭垂於史策合無仰懇

天恩俯准將已故順天府府尹李朝儀歷官政績

宣付國史館立傳以示楷模而資觀感出自

聖主鴻施爲此恭摺具陳是否有當伏乞

皇太后

皇上聖鑒訓示謹

奏

裁遣靈營片

光緒七年七月二十九日

再臣欽奉光緒七年五月十四日

寄諭鮑超各營駐紮樂亭一帶著裁撤步隊十一營馬隊二營派員分起管帶回籍妥為遣散該勇丁籍隸湖廣程途較遠當仍由輪船行走著李鴻章劉坤一卽為豫備知照鮑超飭令各營陸續起程應需輪船經費著李鴻章籌款應付其軍火器械派員點收存儲備用等因欽此遵卽札飭招商局道員唐廷樞等妥速籌備輪船俟鮑超派定裁撤何營暨赴部領回餉項知照開拔日期卽分起駛赴撫甯縣洋河口候裝運至漢口卸載並令署永平府知府陳慶滋及各該州縣妥為照料起行於洋河口多備民船以便剝運另派道員楊嘉善與陳慶滋點收軍械馬匹旋准鮑超咨商一切卽據招商局陸續派往海定日新海晏永清興盛利運鎮東

奏稿四十一

吳

輪船七號利運鎮東兩船裝運一次海定等五船裝運兩次自六月十五日起至七月十四日一律裝竣均赴漢口交卸沿途安靜行走並未滋事應需輪船經費飭令樽節開支由臣於北洋海防經費內籌款墊付其洋河口剝運民船亦核實給價由藩司彙案覈銷至軍械挑留分給未撤各營外其餘劈山礮洋鎗腰刀長矛等械照單點收解津存儲又馬匹除陸續倒斃實收四百匹多已口老疲瘦只能就地酌量變價以資農民耕作之需所有裁撤靈軍十三營備船裝運完竣緣由理合附片覆陳伏乞

聖鑒謹

奏

巴西增刪條約摺

光緒七年閏七月初八日

奏為巴西使臣商請增刪原訂條約經臣酌量相機議辦恭摺具奏仰祈

聖鑒事竊臣於光緒六年六月間遵

旨與巴西國使臣喀拉多穆達議立通商條約已於上年八月初一日定稿繕本畫押鈐印專摺具

奏並將條約正副本及照會稿分送軍機處及總理各國事務衙門備查在案臣因從前中國與各國立約多倉猝定議又未諳西洋通例受損頗多是以與該使往復駁辨按照各國約章酌量變通冀可收回權利亦乘巴西有求於我先就一國稍倡其端將來各國續來議約即可逐漸設法轉移該使等遵允畫諾喀拉多於去年九月出都穆達齋約回國方謂條約已定計期即可互換詎

奏稿四十一

覽

本年三月十九日喀拉多自滬至津據稱接伊國電報禁販洋藥

已允照辦請即添入條規並酌擬增刪原約各節如第一款與別國民人句請改為與相待最優之國民人字樣第十一款案內華巴民人有未甘服應聽照會覆訊一節恐兩國民人藉此拖延滋訟案難了結務求准刪臣以已定之約向不能於未換以前另議刪改惟彼國既願將禁販洋藥添入條款似於中國有益該使復聲請原約第三款領事官不得以商人兼充擬改作商人亦可兼充第四款游歷印照須照會關道請領擬改照各國條約仍由領事發給地方官蓋印臣查當日訂約此二款原為防弊起見斷難

允改其第一款第十一款無關緊要字句未始不可酌刪喀拉多旋即回滬五月杪該使復派繙譯官微席葉來謁謂穆達回國後議院查出原約第十款內華人有本身犯案或牽涉被控凡在巴

人公館寓所行棧商船者均聽中國官派差徑往拘傳此與各國條約照會領事官交出者顯有區別去冬美國修約在巴國訂約之後美約並無此議巴西礙難獨遵力懇改照布約第三十二款以全巴國體面等語臣思華民在各口行棧商船傭工者每恃洋人爲護符遇有犯案不聽傳喚雖行文領事飭交往往庇縱成習由於前此立約未妥一時驟難更改以致流弊甚多今欲藉巴西議約漸收中國自主之權於約內聲明派差徑往拘傳具有深意堅不允行微席葉去後喀拉多函託津海關稅務司德瑾琳屢來懇商均以嚴詞拒絕七月二十日該使自滬來津面遞辨論第十款節略一紙謂出自該國朝廷之意若不准改必將該使調回另行派員來華從新議約情詞甚爲迫切臣反覆開導該使總謂此條不改全約俱作罷論該國絕不肯互換並引中俄新約改訂爲

奏稿四十一

五

辭如堅執不改卽索一答覆節略回國覆命臣於閏七月初一日擬具答覆四條節略面交毫末鬆口該使遂於初二日來署辭行勢將決裂臣因思巴西已成之約照西國各約挽回不少今又允將禁販洋藥添入約款洵於大局有裨彼旣出於甘讓我亦當略爲酬報所議增刪各節尙覺無甚關係惟第十款末節稍重若遽改照各國條約華犯由領事交出何能漸收自主之權若全不通融如滬津等處各國租界早定巴人來必借寓僱華官徑往拏犯巴官雖不敢阻他國領事必出頭阻抗則華巴兩面均有礙且公館商船皆有巴西國旗號巴人可以自主亦未便不知照巴官徑往拏辦况第三款已聲明領事等官必須奉到中國批准文憑方得視事如領事官辦事不合可將批准文憑追回此層最爲緊要關鍵僱巴官庇縱華犯尙可照約追回文憑是操縱仍屬在我

似未便因拏犯一事致將全約所得便利盡行廢棄遂與該使商改由地方官一面知照領事官一面立即派差協同設法拘拏不得庇縱指留等語較各國約款文義稍變蓋由地方官派差仍不失中國自主知照領事官則巴國體面亦無所礙該使允卽照改並將禁販洋藥照美國新約全文添作第十四款共成十七款此臣與巴西使臣喀拉多酌議稍改原約之情形也喀拉多已於初三日回滬據稱電覆本國俟接回信於三禮拜後來津謄寫約本另與訂期畫押專用喀拉多一人銜名其前次已定條約正副本卽作爲廢紙事關改訂條約於原議微有參差而大致無甚出入亟應先事具

奏謹照鈔巴西改訂約款分別黏簽貼說並照錄該使喀拉多面遞節略及臣答覆節略恭呈

奏稿四十一

五

御覽除緘商總理衙門外所有巴西使臣商請增刪原約經臣酌議辦理緣由謹繕摺由驛據實具陳伏乞

皇太后

皇上聖鑒訓示遵行謹

奏

謹將巴西使臣喀拉多面遞辨論第十款末節四條節略並
答覆該使臣四條節略照繕清單恭呈

御覽

巴西使臣喀拉多面遞節略

兩國條約載有巴國民人遇有詞訟案件並不歸中國地方官審辦僅歸其本國官員辦理故此巴國人民房屋棧房商船等處中國官役不得強入一事不過係條約上之意推而論之巴西國家之欲如此者不過欲巴國民人之在中國者比之凡與中國有和約之國其看待民人地位不得較輕

又巴國無論何國民人在巴國所沾之利益已准中國人民一體均沾然中國看待巴國人民欲有異於看待凡與中國和約之國之人民未免有辱於巴國此生事之根也不如先時除去以保將

來永遠和睦

奏稿四十一

五十一

又中國與他國公同立定條約其商訂之地無論或在天津或在中國京都中國之意宜歸一律然德國及美國近修條約已奉大清國

大皇帝允准內中並無中國官員憑其差役至該國民人房屋查拏犯人一款況且美國修約在巴國定約之後明顯中國所准他國得沾之利益不准巴國一體均沾則中國未免於公平有礙矣又中國欲禁止販運洋藥一事乃緊要大有關係之事巴國知此事有益於中國立即允許是巴國大有功於中國也則第十款內所載凡在巴人公館寓所行棧商船等處者均聽中國官員派差徑往拘傳審理等語亦可除去矣

答覆巴西節略

一約內訂明巴國民人案件並不歸中國地方官審辦可見中國絕未輕待巴人至第十款載中國民人本身犯案是專指中國人犯中國法者言之中國有自行拘傳審理之權與巴人毫不相涉實無所謂輕待也

一巴人來中國通商中國必視同凡有和約之國人民無異約內第一款已載明與相待最優之國民人同獲恩施利益至在行棧商船傳人與否所傳乃係中國之民人無關於巴國商務如以行棧商船聽中國自傳本國犯罪之人爲有辱巴國則在行棧商船藏匿中國罪人巴國先自取辱矣巴國肯列此條足見與中國倍敦友睦何至因此生事

一各國每遇修約之期均係擇要先修不能將各條一時全改德美兩國近來修約雖未議及此節日後再遇修約未必不載入約

奏稿四十一

五

內況美國此次在總理衙門修約專爲華工一事而來因及洋藥商稅等條其餘尙未全改蓋議修多年已成之約與創立向來未有之約情形本自不同卽以禁運洋藥而論貴大臣上年不肯於約內載入此條以爲多有窒礙而美國竟肯首先載列則將謂美國自棄其利益乎如美國亦謂販賣洋藥係中國所准他國得沾之利益必欲一體均沾此條恐終無列入約內之曰矣運洋藥爲有礙中國民生之事美國肯列約嚴禁洋商行棧徑行傳人爲有關中國政令之事巴國不肯照行較之美國之待中國恐亦未可謂公平也

一禁販洋藥一條上年貴大臣未卽允定今見美國列入約內始允照添並非立卽允許此次議定畫押之約本大臣已准通融改易不少與禁販洋藥一款亦足相抵未便再將第十條未節刪除

請催粵海關欠解海防經費摺

光緒七年閏七月初八日

奏爲粵海關應解北洋海防經費積欠四結之多請

旨嚴催以警玩世恭摺仰祈

聖鑒事竊粵海浙海等關徵收四成洋稅招商局稅前經戶部會同總理各國事務衙門奏定章程除額撥軍餉外卽儘數分解南
北洋專作海防經費必須按結解清不准挪移短欠又奉光緒六
年六月二十七日

上諭北洋防務極關緊要需餉尤殷各省關應解經費著嚴飭趕
緊撥解大批濟急釐金必解足八成關稅必照章提前儘再延欠
卽著李鴻章覈參照延誤京餉例議處等因欽此節經咨行欽遵
在案近來關稅一項江海浙海等關尙能依期報解惟粵海關自
上年五月二十四日第八十結起至今年六月初五日第八十三

奏摺四十一

五十四

結止徵收四成洋稅招商局稅應解北洋海防經費計歷一年之
久迄未解到絲毫似此貽誤事機實爲向所未有查此四結銀兩
係前任監督俊啟現任監督崇光徵存俊啟既宕緩於前迨崇光
到任接收交代卽應趕緊報解乃既不將前任銀兩補解清楚其
本任徵起銀兩亦復任意延欠經臣咨函疊催輒謂號商湊解京
餉未能周轉僅允解銀三萬兩仍係空談尙未解到約計四結徵
存北洋銀十餘萬兩並未開報數目且海防經費本係指定四成
關稅與京餉應由六成稅內撥解者毫無牽涉何得混稱湊解京
餉憑空套搭顯係飾詞搪塞玩視要需北洋屏蔽

京師海防關繫全局各省關應解經費實與京餉並重是以期限
處分皆同臣前在西洋訂購快船水雷艇及鎗礮等項應需價
值甚巨亟待現銀匯付又因新定鐵甲船價不敷奏明由北洋經

費內湊撥以免他省月措爲難原係統籌兼顧之意乃該關竟積欠至四結之多一若歷次奏案

諭旨全未寓目儻他處相率效尤防務將致停罷尙復成何事體況此係按結徵收洋商現銀並不煩該監督另行籌措久存不解恐有虧挪情弊相應請

旨嚴飭粵海關監督崇光迅將徵存四結北洋經費銀兩勒限一月分兩批埽數解清一面將數目據實咨報查核嗣後務當恪遵前奉

上諭按結提前報解以濟要需而全大局儻再延欠卽由臣奏參照貽誤京餉例議處並懇

敕下廣東督撫臣一體飭催勿任支展理合恭摺由驛具陳伏乞皇太后

奏稿四十一

五

皇上聖鑒訓示施行謹奏

熱河圍場移駐弁兵摺

光緒七年閏七月初十日

奏爲熱河圍場地酌撥綠營弁兵移駐以資協守恭摺仰祈
聖鑒事竊熱河圍場克勒溝等處前設同知司獄巡檢各員經管
錢糧緝捕等事應有弁兵協守當於河屯八溝兩營內撥兵四十
名先行移駐一面會同奏報旋經兵部議覆應於圍場駐防滿營
內就近移撥如滿營官兵不足彈壓卽於河屯八溝綠營內酌量
移撥等因經臣等飭查滿營官兵不敷移撥其河屯八溝等綠營
汛地遼闊周圍至三四千里本亦難於抽調惟圍場地方緊要旣
經添設文員自應於綠營內酌撥弁兵移駐以期兼顧據圍場同
知擬撥千總等四員兵一百名當經知照提臣飭於河屯協三營
內撥給馬步守兵五十四名八溝四營內撥給馬步守兵四十六
名除先撥四十名應再找撥六十名又撥八溝營千總一員惟把

奏稿四十一

要

總外委無可移撥若格外添設又須增費擬於現撥兵一百名內
裁去馬兵四名步兵二名添設經制外委三員額外外委一員卽
以裁去六兵之餉作爲添設四弁餉米養廉之需以上共合千總
等五員兵九十四名應於圍場克勒溝同知公所附近地面駐紮
千總一員協防額外外委一員馬步守兵四十名鑲黃旗地面駐
紮經制外委一員馬步守兵十六名正紅旗地面駐紮經制外委
一員馬步守兵二十三名罕特莫爾川地面駐紮經制外委一員
馬步守兵十五名統歸唐二營守備管轄責令各按汛地協同文
員防守實力巡緝盜匪保護商民不得玩懈應否添設營房飭由
該同知等察酌就近稟請都統臣核辦至馬步守兵內先撥之四
十名前經量加口糧議俟撥定停止今旣撥定應仍令統按原營
底餉支食無庸再加以歸一律除分飭遵照外所有圍場地酌

撥綠營弁兵移駐緣由理合會同熱河都統臣崇綺直隸提督臣李長樂恭摺具陳伏乞

皇太后

皇上聖鑒敕部知照謹

奏

奏稿四十一

五

釐定商船津貼摺

光緒七年閏七月初十日

奏爲安州等處過往船隻向有津貼要差現經申明定章嚴禁額
外勒索以綏商旅恭摺仰祈

聖鑒事竊准部咨光緒七年四月二十九日奉

上諭給事中樓譽普奏直隸安州雄縣新城地方近有匪徒勾結
蠹役私設卡局抽收船戶錢文名曰船頭勒索行旅大爲地方之
害請飭嚴禁等語該處爲往來通衢豈容匪徒私立船頭名目擾
害地方著李鴻章飭屬查明一律嚴禁以恤商旅欽此當飭清河
道葉伯英於出省防河之時認真查辦茲據該道詳稱安州北關
雄縣南關新城縣白溝河爲津省水路要衝每年有承運
西陵米石並經管漕運官剝船隻

陵米例領水腳無幾官剝工食亦微均須另籌貼補且夏秋陸路

奏稿四十一

五

被水往來文報及餉鞘人犯均應改由水路遞送船差絡繹供億
甚繁該州縣並無例設水驛不能開支工料而運米等項又屬要
差勢難延誤是以向章借資過往商船津貼派撥船頭常川伺應
以期上不誤差不累民並非私設卡局亦與任邱趙北口情形
不同同治十一年船戶馬萬福呈控安州船頭訛索飭據保定府
查訊將向章所收錢數酌量議減凡大貨船每隻津貼制錢四百
文小貨船每隻津貼制錢一百文煤船每隻津貼制錢二百五十
文其餘商貨回空及官民坐船概免津貼又雄縣新城於光緒二
年文安縣船戶張萬成等呈控案內飭據司道查明酌議津貼錢
數凡滿載貨船如願包年每歲不論往來次數多寡大對子船津
貼制錢二千文小對子船津貼制錢一千四百文廠船津貼制錢
一千八百文如願按次津貼大對子船津貼制錢四百五十文小

對子船津貼制錢二百五十文廠船津貼制錢四百文篷船等船
津貼制錢二百文其餘貨船回空及官民坐船概免津貼均經臣
核定批准榜示河干其雄新二縣並已刊立碑石在案該道以該
船頭等果皆照章收取津貼供應差務何至擾累商旅嘖有煩言
乃訪聞商船於交納津貼之外尚有規費顯係船頭書役從中勒
索即經督飭各州縣將船頭書役人等提案責革一切浮費盡行
裁除由該道刊刻原定津貼章程嚴禁需索告示在於省城南關
安州北關雄縣南關新城縣白溝河及商船往來停泊埠頭徧行
張貼並飭該州縣重泐碑石樹立河干一面將告示移送天津官
船局曉諭船戶一體遵守儻該船頭等再取額外需索許船戶即
赴所在地方衙門喊控立拘該船頭等嚴行究辦柳示河干該管
州縣稍有徇庇或漫無查察別經發覺亦即從嚴參辦等情具詳

前來臣查直隸賦額甚輕原因

奏稿四十一

五

畿輔重地徭役較繁須藉商民之力以資挹注船差亦其一端從
前沿河州縣曾有匪徒勾通書役索詐商船疊經臣與司道等訪
聞查辦將並無差務各處私設船頭卡局禁革殆盡並於天津設
官船局均平差徭照民價雇用不准絲毫擾累安州雄縣新城既
有年例剝運

陵米等項要差地方又皆瘠苦勢難加派民間是以向借過往商
船津貼係爲體恤閭閻免誤差務起見歷就該州縣因差輕重議
定津貼章程酌減收數尙屬公允惟該船頭等藉端格外勒索殊
堪痛恨現經葉伯英督飭該州縣提案責革除盡浮費將津貼章
程徧行曉諭重泐碑石應飭該司道等隨時認真督察嚴禁永遠
不准浮收分文以綏商旅儻州縣及吏役稍有擾害即分別從嚴

參辦理合恭摺覆陳伏乞
皇太后
皇上聖鑒謹
奏

奏稿四十一

六

李文忠公奏稿卷四十一

